


بنتكلم مصري

خامس جزء



سامي حرك

اسم الكتاب: بتكلم مصري - خامس جزء

اسم الكاتب: سامي حرك

رقم التسجيل: 2017 / 5 - 2017

التصميم والتنسيق والفهرسة والمراجعة : صفا حرك

الانترنت والأرشيف الدولي: **Maātāb Mostafa**

حقوق النشر © محفوظة للمؤلف سامي حرك 2026

موبايل: 01016290785 / 01286175455

www.facebook.com/samy.harak.9

samy7arak@gmail.com

<https://twitter.com/samy7arak>

مقدمة

صناعة الهويات

الهوية طبيعية واقعية، بتصور الواقع الاجتماعي والجغرافي والثقافي! انما بعد الحرب العالمية الأولى (1918)، انتهت امبراطوريات العصور الوسطى (الألمانية والبروسية والروسية والنمساوية والعثمانية .. الخ)، وبدأ تشكيل العالم بشكل مختلف!

ظهر نوع جديد من الهويات، صناعي، لا طبيعي ولا واقعي! لأن العالم الجديد ده، كان محتاج اصطناع هويات جديدة للوحدات السياسية الجديدة!

الأدب، كان أهم أدوات صناعة الهويات!

• ف روسيا استغلوا الأديب الواقعي الخطير "مكسيم جوركي"، ف صناعة "هوية اشتراكية"، مخلوطة ع "الهوية الوطنية"، وكأنهم حاجة واحدة. والي يفرق بينهم يبقا "خاين" ويا ويله ويا سواد ليله!

• عندنا ف مصر، مع ظهور رواد مشروع الإسلام السياسي (رشيد رضا وحسن البنا .. الخ)، استغلوا الأديب الشاعر "علي أحمد باكثير" - مصري أندونيسي- ف صناعة "هوية اسلامية"، ضد القوميات والوطنيات، وتهمه التكفير جاهزة للمعارضين!

بغض النظر عن نجاح أو فشل، مشاريع الهويات الاصطناعية المنافسة للهويات الوطنية، إنما التجارب دي لسه حاضرة أدامنا واحنا بنحاول نرجع

هويتنا الوطنية "الهوية المصرية" لمكانها الطبيعي، بتورينا إن الرجوع ده مش بالأحلام والتمني، إنما بالعرق والمجهود الجامد، والخطوات المدروسة لتحركاتنا، وتوظيف كل امكانياتنا، ومن ضمن الامكانيات دي كل صور الميديا فيديو وسينما ومسرح، والكتابة من مقال ودراسات وشعر وقصص...نخ!

الهرم 20 طوبة، 6267 مصري، موافق 28 يناير 2026 ميلادي

1693 جلابة

مفروض تكون الجلابية زي وطني رسمي!

- ليه؟

عشان ده إختراع مصري، وفيه كل شروط الزي الرسمي، بدليل إن أكثر من ثلاثين بلد أفريقي وآسيوي وخداه زي رسمي!

gerp , Rev. 13, 29, to be wrapped up.

الحكاية إننا -المتعلمين- متعودناش عليها، إنما شوف الفلاحين والصعايدة يلبسوها ف المناسبات وجاهة ونخامة ولا أشيك بدلة!

- الجلابية للرجالة

- الجلابية للستات

شوف كده صورة من بردية آني ومراته توتو، كأنهم لابسين يونيفورم واحد!

كلمة "جلاية" تصريف من جذرها الهيروجليفي: جلب = تغطية/ سترة/ لف الجسم بالقماش .. نلخ!

أي شعب يحاول يسرق الإختراع المصري القديم ده، يورينا مستند لأصل الكلمة اللغوي، أقدم من المستند اللي ف الصورة دي!

أي شعب يحاول ينسب صناعة الجلاية عنده قبلنا، يورينا دليل أثري أقدم من جلاية "نخت-ف" حاكم أسيوط من الدولة الوسطانية (2000 ق.م)، أو جلايب متحف النسيج 1500 ق.م، ومتحف الحضارة، أو حتى مستند أقدم من بردية آني .. أو .. أو .. أو ..

الجلاية إختراع مصري أصلي، بالإسم والشكل، لسة الجدر اللغوي متسجل، ولسة الصور ونماذج حية موجودة ومعروضة ف المتاحف!

2024 /8 /7


1694 لف .. لفة

عيني بترف، وراسي بتلف

واحنا صغيرين كما بنلعب "رفة"، يعني تحدف القرش الصاغ بصباغك لفوق، تخليه "يرف" يعني يلف كثير، وبعدين تلقفه وينزل ف كفة إيدك، فتسأل اللي بيلاعبك: ملك ولا كتابة؟

ال "رف" وال "لف"، معانيهم مضروبة ف الخلاط، داخله ف بعض، والسبب الحرفين القرايب، اللام (ل) والره (ر)!

حتا صنعة الـ "رفة" الي مقصود بيها تصليح عيوب القماش والخياطة، الأصل إن صناعي الرفا بيلف ويدور بالإبرة والخيط يداري العيوب، ويعمل اكروبات عشان القطع ميبنش!



قاعدة إهمال الحروف، يعني الحروف الي مبتتنطقش أتاري الإهمال مش بس ف النطق، دا طلع ف الكتابة كمان، وإن كاتب الهيروجليفي نفسه كان عارف القاعدة دي ومعترف بيها ويطبقتها، ومن الدلائل الكلمة الي ف الصورة، القاموس موضح إن: رب / ربت، أصلهم بالحروف الكاملة = "ربت"، يعني سنة!

"ربت" دي كلنا عارفينها، وعارفين معناها = سنة، بخصص علامة السنين

إنما "رب" و"ربت"، بارضو بخصص السنين، ومعناهم = سنة!

يبقا الفرق إيه؟ مفيش فرق خالص، غير إن حرف النون - بتحصل كتير-

بيتطنش، يعني يحصل معاه إهمال، مبيتتنطقش!

نفس الحكاية إتكلنا عنها قبل كده، ف كلمة "منخيت"، الي بتتنطق "نخيت" ومنها خيط وخياطة!

- الجديد إيه؟

الجديد هنا إن معنا كلمة سنة "رب/ ربة" بالبه الثقيلة، تتصرف لكلمة "لف/ لفة"!

التصريف ودانا لأبسط تعريف لكلمة "سنة"، اللي هيه عبارة عن حساب زمن المسافة بين ظهور نجمة "سبتت" مع الشمس، وبعدين تلف وتظهر تاني ف نفس المكان والوقت بعد 365 يوم وربيع! لأن السنة عبارة عن "لفة" كاملة (دورة نجمية كاملة) للنجمة سبتت، اللي بيقولوا عليها دلوقتي الشعرا!

يعني التصريف الخفيف اللطيف ودانا لأدق معنا لكلمة السنة year ف حب نجمتنا الجميلة ليلا مراد (أمي كانت مسمياها لولا)، ونجم النجوم الريحاني:

- "عيني بترف وراسي بتلف، وعقلي فاضله دئيئة ويخف"

2024 /8 /8

1695 خلفتة .. خلفنة

er kha-t	ⲉⲕⲭⲁⲧ	=	ⲉⲕⲭⲁⲧ	in accordance with.
er kheft	ⲉⲕⲭⲉⲫⲧ		ⲉⲕⲭⲉⲫⲧ	opposite, in face of.
er khent	ⲉⲕⲭⲉⲛⲧ		ⲉⲕⲭⲉⲛⲧ	before.
لفت (نظره) - لخفت (لخفتة/لخفنة)				
er khet	ⲉⲕⲭⲉⲧ		ⲉⲕⲭⲉⲧ	in the following of, in the charge of.

خلفت / خلفتة

لخفن / لخفنة

- لفت نظره للموضوع

- لفتت وشها وشافته

كله كلام أصلي مصري، لأن جدوره

من أقدم مرحلة كتابة ، يعني من آلاف السنين!

حتا لو لقيت الكلام ده ف قواميس سرقة كلام العجم (معاجم)، يبقا العبرة بالأقدم!

كلمة صغونة ف ودن دراويش الشيخ الإصطلاحى:

- الحاجة إجتهد وعمل قواميس كتر ألف خيره، وفيه منهم كتير محترمين،

بس خلي بالك دا مكنش لوجه الله والإنسانية والعلم والبلا بلا بلا!

دول كانو جايين من بلادهم زي عمال التراحيل. يشتغلو ويسترزقو،

والبعسات (بعثات) دي لغاية دلوقتي عبارة عن أكل عيش وسبوبة من

جامعات ومتاحف ومنظمات وبارضو من مخبرات وتجار وحرامية أصار

(آثار)!

عشان كده لما أحمد كمال باشا عمل قاموس بالطريقة اللي أنا سميتها

#النطق-التصريفى-الحركي هاجموه وتجاهلوه وحيدوه وإندفن مشروعه أكثر

من سبعين سنة!

لأنه كده كشف إن المسألة مصالح ومش علم، وإنهم عشان يختصرو ويلخصو ويخلصو المقابلة، اخترعو طريقة [#النطق الإصطلاحي](#)، اللي خلت كلام المصريين القدام مفصول عن كلام المصريين الحالي، وكأنهم كانوا شعب تاني وكلامهم كلام تاني خالص!

الخفنة والخفنة، بنفس المعنا، عكس الكلام، بلبلة الأفكار، (نخمة) القرارات .. نلخ!

ف قواعد اللغة المصري، ادبت إسم لقاعدة تبديل مكان الحروف "خفنة"، لما تقول: (تموين/ تومين - فائلة/ فائلة - أرانب/ أنارب - ملاعق/ معالق .. نلخ).

العجبية إن عندنا ف بلدنا بلقاس (وغيرها) منعرش غير كلمة (خفت/ خفنة)، ومعرقتش كلمة (لخفن/ خفنة) دي غير لما جيت القاهرة.
- بلاش خفنة/ بلاش خفنة/ بلا نخمة

دي واحدة بس من ملاحظاتي ع [#النطق الإصطلاحي](#) إنما فيه ملاحظات تانية كتير، زي حرف السين اللي مفروض بيتصرف مع الصاد (أسوان/ أصوان)، ومع الزين (سعف/ زعف)، ومع الشين (سجرة/ شجرة)، كمان نطق الحروف الخفيفة والثقيلة وتصاريقها، ودي حاجات مهمة، تخيل إن اللام الخفيفة مع الألف (لا) يبقا معناها الرفض والنفي، وبمجرد متخليها ثقيلة (لا) تبقا نعمة دلع وقبول وفرح، تقدر تحسها من لالالالات سعاد حسني ف الدنيا ربيع والجو بديع!

2024 / 8 / 16

1696 الجنة وأساميها


Gardiner's list codes D2:D21-N1
Translation Upper part, top, (one) who is above/over (someone), chief
Transliteration hrw
Translation Sky, heaven

- الحلو والحلوة

- العالي والعالية

- الأوضة والبيت والوطن

- الفردوس

أول مرة ف تاريخ الكون، تتذكر الجنة

اتذكرت ف مصر، بالحرف الهيروجليفي

- مكان ف السما للموعودين الصالحين!

من أساميها (اصطلاحى & وتصريفى):

* حرو/ حروت - حلو/ حلوة

* وجات/ وجة/ وضة - اوجات/ أوجة/ أوضة

* علو/ عالو - عالية/ عليين

* بيت

* أسرت/ أسرة - اسرا/ اسراء

* وتن/ وطن

* بر-دوا (بردوس/ فردوس)

وفيه أسامي ثانية، مباشرة ومحسوسة


الأسماء الكثير دي، عبارة عن وصف لكل حالة، فيه منها الوصف العمومي، زي أول إسم "حلو/ حلوة"، ولغاية النهاردة، بنغني الحياة "حلوة"، ونقول البيت حلو، الغيط حلو، اللبس حلو، العيشة حلوة، البت حلوة ... نخ! كان "عالو"، وصف للشجر العالي الكثير اللي ف الجنة!

يعني كلمة "يارو" المشهورة دي، معناها الحرفي = غيطان القمح اللي ف الجنة! - أو مال كلمة "جنة" نفسها جت منين؟

من جدر مصري بارضو، معناها الحرفي = شجر كثير، ومنها تصارييف "جنية" وجمعها "جناين"!

2024 / 8 / 23

1697 شذوذ .. غزو



الشذوذ والغزو

قراءة ونطق كلام المصريين القدماء بالطريقة الإصطلاحية، مش كفاية!

#النطق الإصطلاحى اللي بتتدرس

بيه كتابة المصري القديم، محتاجة طريقة ثانية تفسرها وتكملها!

- الطريقة الثانية دي سميتها طريقة: #النطق التصريفي الحركي

طريقة النطق التصريفي بتطبق قواعد علم الصرف!

تصريف حروف المخرج الصوتي الواحد، زي حرف السين اللي بيتصرف مع الصاد والزين والذال، وكان حرف الخه مع الغين والشين، وباقي الحروف بارضو لهم حالات تصريف شبه دول!

التصريف بالطريقة دي قديم أوي، حتا موجود من مراحل الكتابة القديمة:

هيروجليفي وهيراطيقي وديموطيقي!

يعني ف نفس القاموس الهيروجليفي، ممكن تلاقي نفس الكلمة بنفس المعنا، مكتوبة مرة بالشين ومرة بالخه، ومرة بالغين!

ومنشاش التصاريف المشهورة اللي عملها المصريين مع الكلام اليوناني:

"أرشميدس" باليوناني، بقت "أرشميدس" بالمصري!

هنا كلمة "خاست" -بالنطق الإصطلاحي- اللي بتعبر عن الأراضى الأجنبية، والأجانب والغزاة (الأقواس التسعة)، بمجرد ما نطبق عليها حالات النطق

التصريفي، نلاقيها مع الشين = شاذت، ومع الغين = غازت!

كده الكلمة فسرت نفسها، بمجرد تطبيق النطق التصريفي

* طبيعي وصف الحاجة الأجنبية الخارجة عن المؤلف بإنها: "شاذة"!

* وطبيعي وصف الشعوب الأجنبية اللي بتحارب مصر إنهم: "غزاة"!

- مش كده، ولا إيه؟

2024 / 9 / 1

1698 اللغة العربية، أجنبية

اللغة العربية، لغة أجنبية، بالنسبة للمصريين
اللغة المصري، هيه اللغة الوطنية للمصريين.

"كثيراً من الناس ليقولون إن اللغة العربية التي
يتعلمها الصبي في المدرسة لغة أجنبية بالقياس
إليه، لأنه لا يتكلمها ولا يسمعها مع الذين
يعلمونه اللغة العربية نفسها فضلاً عن الذين
يعلمونه الجغرافيا والتاريخ وغيرهما من العلوم"

مستقبل الثقافة في مصر – طاهيا حسين

#بنكلم_مصري

اللغة الرسمية، ممكن تكون لغة أجنبية، زي الهند أول لغاتها الرسمية الإنجليزية!
إنما مفيش هندي بيعتبر إن اللغة الإنجليزية الرسمية هيه لغته الوطنية!
اللغة العربية رسمية ماشي، دينية ماشي، إنما تفضل لغة أجنبية مش وطنية!
لازم اللغة الوطنية الحقيقية (اللغة المصري/ اللغة المصرية الحديثة) تدخل
مناهج الدراسة!

2024 /9 /11

1699 عجوة

	
Gardiner's list codes	
D36:W11-G1-D26&Z2	
Transliteration	عجوا
'g'	
Translation	هريسة البلح
Mash, squash (dates)	

العجوة أكلة مصرية

عجوا، بالألف، حسب أصلها المصري

نطق ومعنا، عجوا

- هريسة البلح

* يعني مش نوع من البلح

لأن فيه بلاد بتسمي نوع من البلح

"عجوة"، تقليد للعجوا المصري، أو تشبيهه بيها!

* البلح بعد ما بيطيب ويسود، بيتغسل ويتنصف من القشر والنقا، ويتهرس

وينضاف عليه سمنة أو زبدة!

البلح قديم أوي ف مصر، وسطوح البرابي كانت بتتسقف بالنخل، وفيه

عمدان برابي بشكل النخل، يعني مش كله لوتس وبردي!

* العجوا، والتين، والعسل الأبيض، وزبيب العنب، كانت وسيلة تحلية

المخبوزات (الحلويات)!

2024 / 10 / 17

1700 حب الغير

عيد للجنس البشري كله

إتفاجئت لما لقيت العيد ده "حب-غيرو" مباشرة بعد عيد توحيد الأرضين!
إحنا عارفين، إن عيد "توحيد الأرضين" كان إمبراح 21 بابه / 31 أكتوبر.
دلوقتي بقا عيد واخد حقه ف الشرح والإحتفال، بإعتباره العيد الحقيقي
لتأسيس الدولة المصرية!


بأساميه الكثيره، وكلها لسه ف كلامنا الحالي #اللغة_المصري

* سما تاوي / صمطاوي

* حب-طاوي

* ضم-طاوي

* دمج-طاوي



تاني يوم من الإحتفال الرسمي والشعبي الكبير ده، نلاقي في قائمة أعياد مدينة
هابو، عيد تاني إسمه "حب-غيرو"!

القاموس مترجمه = عيد الكائنات الأرضية.

راجعت كلمة "غيرو" ف أكثر من قاموس، بنفس مخصص الإنسان، لقيتها
بتدل ع الجنس البشري كله!

أعتقد المصري القديم، كان يقصد بالعيد ده الإحتفال بالأخوة الإنسانية،
بكل البشر!

- ليه؟

1- لأن الإحتفال معاده ثاني يوم من الإحتفال بالنفس (توحيد شعب
مصر)!

يعني رسالة إننا زي ما بختفل بنفسنا، كمان بختفل بالإنسان ف كل مكان
(الغير)!

2- ولأن المصري القديم مكنش يحقر ويشتم غير العدوين، يعني الأقواس
التسعة والكلام ده، ف حالة التربص والعداوة بس، أما ف حالة السلم
والتعاون، زي رحلات بلاد بونت، ف كلنا ف الإنسانية إخوان!

2024 / 11 / 1

1701 عن حروف الكتابة

شويت (ة) كلام عن حروف الكتابة

مش لازم نلتزم بقواعد أي لغة لمجرد إننا بنكتب بحروفها!

مادام بنتكلم مصري، يبقا نلتزم بس بقواعد المصري، حتا لو كنا بنكتب
بحروف نبطي (عربي)!

إحنا مش معقدين، ونقدر نكتب بأي حروف، لأنها كلها من عندنا، بس
القواعد بقا تخصصنا!

تطور حروف الكتابة ف العالم كله بدأ من مصر، صحيح فيه نظريات عن تزامن أو حتا سبق الكتابة المسمارية السومرية، إنما الحاصل إن الكتابة المسمارية متوحدة عاقر مخلفتش وملهاش أثر ف تطور طرق الكتابة ف العالم!

عكس حروف الكتابة المصرية، حروف من الطبيعة، مليانة خير، وللادة وخلفتها مالية الأرض، أثرها موجود ف كل حروف كتابة العالم، نقدر نشوف ده بالعين المجردة، حتا اللي مش متخصصين!

*** من الحروف المصرية مباشرة، للحروف الآرامية، ومن الآرامية للسريانية والعبرية والسبأية والجعزية الحبشية والنبطية العربية.

*** من الحروف المصرية مباشرة، للحروف الفينيقية والإغريقية اليونانية، ومن اليونانية للاتينية والسيريلية.

اللاتينية أشهر من اليونانية، رغم إن اليوناني أصل اللاتيني! غرب أوربا حروفه لاتيني، وشرق أوربا وروسيا حروفهم سيريلي، واللاتين أصلهم يوناني قديم!

*** كل دولة (شرق وغرب) بتكتب نفس الحروف، بس بشكل مختلف، وساعات كان النطق يختلف!

Greek Letters			
A α alpha	B β beta	Γ γ gamma	Δ δ delta
E ε epsilon	Z ζ zeta	H η eta	Θ θ theta
I ι iota	K κ kappa	Λ λ lambda	M μ mu
N ν nu	Ξ ξ xi	O ο omicron	Π π pi
P ρ rho	Σ σ sigma	T τ tau	Υ υ upsilon
Φ φ phi	Χ χ chi	Ψ ψ psi	Ω ω omega

*** كل دولة (شرق وغرب) بتلتزم بس بقواعد لغتها هيه، وملهاش دعوة بقواعد لغة غيرها (رغم الشبه الكبير والأصل الواحد لحروف الكتابة اللاتينية)!

العملية سهلة أهيه

وعندك Google تتأكد بنفسك!

طب اشمعنا إحنا بس اللي اتحكم علينا بالمؤبد؟

ومنقدرش نكتب مصري حسب قواعد [#كلامنا_المصري](#) إلا ويطلعولنا ضحايا

التعريب، عاوزينا بالعافية نكتب حسب قواعد النبطي العربي؟

- المصري مفهوش حاجة إسمها حروف مقدرة:

يبقا نكتب: حتا/ بقا/ علا .. بدل حتى/ بقى/ على

- المصري مفهوش ألف بعد واو الجمع:

يبقا نكتب: سمعو/ كتبو/ عملو .. بدل سمعوا/ كتبوا/ عملوا
 - المصري مفهوش تنوين، والنون حرف توكيد ولازم تنكتب:
 يبقا نكتب: شوكرن/ أبدن/ جدن .. بدل شكرا/ ابدأ/ جدا
 - المصري مفهوش تسكين أو كتم صوت، #نكتب-زي-مانطق:
 يبقا نكتب "معا" بدل "مع"، و"لاكن" بدل "لكن" .. نغ!
 2024 / 11 / 9

1702 نشر

نشر نشرة منشور
 نشر جناحه = فرده
 نشرت الغسيل = فردته ف الشمس
 نشر البيان = ذاعه

نشر  , Rev. 12, 65, hawk (?)
 nesher  crane (?); Copt. $\pi\omega\psi\epsilon\rho$.

يعني اصل النشر، تصريف من حركة فرد الجناح وإنتشاره
 نشرات الأخبار
 مناشر الغسيل
 منها الأفعال: ينشر/ تنشر/ أنشر

وكان منها الأفعال: ينتشر/ تنتشر/ إنتشر

"إنتشار" حب الهوية المصرية!

2024 /11 /22

1703 صورة جدي



من 4474 سنة

الأسرة الرابعة

أصل إسم عائلة "حرك"

ف مصر والعالم

(جدي) الكاتب "رع حرك"، ومراته (ستي) مري س عنخ

متحف اللوفر

حلوين من يومنا والله

2024 /11 /24

1704 السنة مجرد "لفة"

الأرض بتـ "لف" حوالين الشمس "لفة"!

"لغة" الأرض حوالين نفسها، بتعمل الليل والنهار!

و"لغة" الأرض حوالين الشمس، بتعمل السنة!

الأرض بتكمل "لفة" كاملة حوالين الشمس كل ٣٦٥,٢٥ يوم.

- جدودنا كانو عارفين الحكاية دي؟

- بالتأكيد، عشان كده اكتشفو التقويم، ونظمو الوقت بالسنة قبل أي حد،

وقبل أي شعب!

المصريين سبقو الكل ف اختراع نتيجة السنة!

وكانو حاسبين وعارفين لفات الأرض

الكلام ده له ١٧ دليل وقرينة، عرضتهم بالتفصيل ف كتابي [#الأعياد](#)

وف البوست ده دليل جديد، من اللغة، كل الحكاية اننا نقراها بطريقة النطق

التصريف:

بالنطق الإصطلاحي: سنة = رب / ربت / ربة

بالنطق التصريفي: سنة = لف / فـت / لفة



بنلف نلف نلف نلف

والسنين بتلف تلف تلف
والآلام بتزيد وجراح بتخف. . "بلغ حمدي"

2025 / 1 / 1

1705 رفيق


الفرق بين "الصاحب" و"الرفيق"

- من اللغة المصري

الكلمتين من جدور هيروجليفية أصلية

* المصاحبة، وقتية، جزئية، مرحلية!

* المرافقة، أبدية، كلية، شمولية!



صورة البوست فيها جدر لتصاريف: رفق / رفيق / مرافق / مرافقة .. وحتا
مرفق ومرافق للخدمة الطويلة العامة ... نخ، كلها من الجدر "ربق/ رفق" اللي
معناه إسم الكرسي الأزلي المرافق لأوزير، رضي الله عنه وأرضاه، وقدس
روحه .. آمين

مصادر (جدور) الكلام المصري كلها أسامي

1706 عاش



عاش عاش .. عاش اللي ءال
دي تصريفه أصلية لكلمة "عنخ"
عنخ يعني عاش

مش دي المشكلة، لأن فيه نماذج كتير
لتصاريف من زمن الكتابة الهيروجليفيه
المشكلة ف حرف النون، اللي حسب
قواعد علم الصرف بتتطبق عليه قاعدة
الإهمال

قبل كده كتبت عن جدرين مشهورين، تطبيق قاعدة الإهمال عليهم حولوهم
لكلام مفهوم، هو ما إيه ؟

* كلمة "منخيت"، يعني نسيج، بالتصريف تبقا مخيت / مخيط

* وكلمة "رنبت / رنة"، يعني سنة، بالتصريف تبقا ربت / ربة، وبالشقبة تبقا
لفة، وكأن السنة مجرد لفة نجمية، زي ما شرحنا قبل كده!

اوعو يكون الكلام ثقيل، إنما الخلاصة اننا لازم نطبق قواعد التصريف ع
الجدور المصرية، وأديكو شايفين ف الصورة المصري القديم نفسه كان بيصرف
الكلام، الخه اتصرفت بالشقبة مع الشين!

طبق قاعدة الإهمال بقا ع النون، هتلاقي "عنش" الاصطلاحية، بقت "عش/
عاش" بطريقة النطق التصريفي!

- بس كده!

أومال فاكرين الهتاف المصري الأصلي ده جا منين؟

عاش عاش عاش .. يعيش يعيش يعيش

2025 / 1 / 10

1707 ناووس، ولا تابوت

ساعات المرشدين يستعرضو قدام الزباين، يشاور ع التابوت الحجر، ويقول

ناووس naos، أو يقول ساركوفجس sarcophagus .

طب الزباين لو مصريين، كلمهم بالمصري

ولو أجانب، مفيش مشكلة بارضو لو كلمتهم بالمصري

صحيح إن كلمة "ناووس" أصلها يوناني

وكلمة "ساركوفجس" أصلها لاتيني

انما المقصود بيهم كلمة "تابوت" اللي معروفة ف لغات كتير، ومعروف كان إن

أصلها مصري، من مرحلة الكتابة بالهيروجليفي.

وكان مقصود بيها كلمة "كفن" المتصرفة من الكلمة الهيروجليفي "كبن/ كبنة"

وبالتصريف "كفن/ كفنة" يعني كابينة أو مركبة بحرية، وعارفين إن الميت

 Gardiner's list codes D46-D58-Z7:X1-V19 Transliteration <i>dbt</i> Translation Cage	 Gardiner's list codes D46-D58-Q6-X1:O39 Transliteration <i>gbꜣt</i> Translation Sarcophagus, stone coffin
 Gardiner's list codes R5-Q3-N35:X1-P1 Transliteration <i>kbnt</i> Translation (seagoing) ship	NAOS "ناوس" من اليوناني Sarcophagus "ساركوفاجاس", لاتيني "تابوت", تصريفة مصري "كفن", تصريفة مصري

2025 /1 /11

1708 المنحة يا ريس



Gardiner's list codes

 Y5:N35-V28-X1-U33-M17-M2:Z

 2

Transliteration

mnht

Translation

أنا بحكي تفصيلة عارفها كل الشعب المصري، من فوق الخمسة وأربعين وانتا طالع

أتاري كلمة منحة دي لها جدور من اللغة المصرية القديمة، ومش أي منحة يعني هدية وخلاص، قاموس بادج كاتبها بالتحديد: هدية ملكية! ارجعو للقاعدة، اللي اتشرفت بتأسيسها وأقدر أدافع عنها كويس: الكلام المصري مصدره (جدوره) أسامي!

يعني أي كلمة، حتا الأدوات، تدور وتمشي وراها تلاقي أصلها إسم مش فعل زي العربي!

--- عكس العربي تماما، المصري أصله إسم، ومن الإسم بتتصرف الأفعال وإسم الفاعل و المفعول والصفات وكان الأدوات!

هنا إسم الهدية الملكية: "منحت / منحة"، ومن الإسم ده اتصرفت الأفعال: منح / يمنح / يمنح / يمنح

وإسم الفاعل: مانح / مانحة / مانحين

وإسم المفعول: ممنوح / ممنوحة / ممنوحين

والصفة: منحة

2025 / 1 / 12

1709 فل وياسمين

صباح الفل

نهارنا فل

الفل هو الياسمين؟

- الفل هو الإسم المصري للياسمين

المتخصصين يعتبروه نوع من أنواع الياسمين

إنما الحقيقة إن ده الإسم المصري

والاسم منتشر ف مصر أكثر من غيرها

الجدد "نفر" من أكثر جدور

الهيروجليفية المصرية المشهورة،

وتصاريفه كثير أوي، حسب المخصص!

* نفر، يعني جميل

* نفر، يعني جديد، ومنها الفرنساوي new

* نفر، يعني عسكري، وجمعها أنفار

* ونفر، اتصرف منها إسم نوفل

* نفر، يعني زهرة جميلة

* هنا النون سقطت بالاهمال من نفر، بقت (فر/ فل)

خليك/ي إيجابي/ة، وشاركونا ف تمصير النطق الإصطلاحي للهيروجليفي.

فل الفل يا فولالي

2025 /1 /12



Gardiner's list codes
M9
Transliteration
nfr
Translation
Good, well

فل

قنطرة 1710

قنطرة الخنفية

قنطرة خلاط الماية

قنطرة خلاط الحمام

قنطرة العرية

كل ده مقصود بيه عمود أو قضيب أو سيخ أو ماسورة توصيل .. نحاس

حديد خشب مش قضية

أصل التسمية إيه؟

وخليكو فاكرين القاعدة اللي اكتشفناها هنا:

"الجدور المصرية أصلها أسامي"

يعني أصل كل كلمة من كلامنا المصري القديم والحالي، بدايته إسم، ومن


الإسم اتصرفت الأفعال والصفات!

طب قنطرة أصلها إيه؟

ومحدث ينكسف من الحقيقة والعلم

القنطرة، أصلها (بالخفنة) إسم من أسامي قضيب الراجل (أو جزء منه)،

وبقت صفة أو كناية عن أي قضيب أو عود أو وصلة!



منها قنطرة يعني كوبري، الكوبري (له أصل مصري) أداة توصيل بارضوا!
- وتعالا يا شالاطر، نروح الأنااطر

2025 / 1 / 14

1711 فشري يا لينا ؟

من مسرحية المتزوجون

شيرين: - مسعودي، إحنا فوقرا يا مسعودي؟

سمير غانم: - فشري يا لينا، إحنا مساكين يا روحي

ولو حظك حلو وسكنت ف حي شعبي هتسمع كلمة "فششر" دي كتير ف

الردح بين الجيران!

معناها الأصلي إيه؟

معناها = هلوسة/ كلام مساطيل











وجت كان، أداة سؤال واستنكار: إيه؟ بتقول إيه؟

ومنها الفشر، يعني الكذب، والكدايين

افتكرتها وأنا بسمع تسجيل ردح ف الكنيسة الإسرائيلي

- فشر أتا (فششر انتا)

- فشر أني؟ (فششر أنا؟)

pekhar  , Rev. 13, 40,  , Rev. 12, 70, to bewitch, to work enchantments by means of drugs.	pesher  , U. 260, M. 787,  , P. 96, 713,  , P. 96,  , N. 41,  , N. 661,  , N. 625, to revolve, to make a circuit, to turn the face round; see .
petr  , an interrogative article, what?;  , what is the matter?	فششر بتقول إيه؟ دا كلام مساطيل بلاش لف ودوران

إسرائيل مطعنة نص كلامها من ([#اللغوة_المصري](#))

اللغة المصري (اللغة المصرية الحديثة)، اللي الحكومة بتاعتنا مش معترفة بيها، وملهاش أي قسم لدراستها ف أي جامعة أو مدرسة!

2025 / 1 / 17

1712 مقال .. مقالات

* لا تدوور ولا تحتار، مصر حلالة الأسرار


* لا زمالك ولا أهلي، كلامك مصري أصلي

* لا يمين ولا شمال، المصريين عال العال

الحرامية اللي سرقو كلام المصريين ونسبوه ف المعاجم لنفسهم، احتارو واختلفو

-الحرامية- ف الكلمة دي، جت منين وأصلها إيه؟

- مَقَاوِل ومَقَاوِلَة ومَقَاوِلَات، جدرهم من الهيروجليفي المصري كلمة "قاور/ قاول"، بمعنا أعمال النقل والتحميل!
- تصريف "قاول" لوصف المسئول عن العمال والجمالين دول بكلمة "مقاول"، والعملية موضوع الشغل "مقاولة"، والجمع "مقاولات"



- قاموس بدج، لممح كان، إن الجدر ده اتصرف منه عن طريق اللاتيني ف اللغات الأوربية، الفعل

Carry


2025 / 1 / 18

1713 طلع علا فشوش!

- يعني طلع ع الفاضي (مفیش فايدة منه)!
- فيه حد غيرنا بيقول الكلمة دي؟
- نقبه طلع علا فشوش!
- طلع عشمنا فشوش!

- طب، إيه معنا فشوش / فاشوش؟

الفشوش = التفتيت / التكسير / التجزيء / الانفلات / البعثرة / الفاضي .. نلخ
القاموس كان مختار يعبر عن الكلمة إززاي، ترجمها بالإصطلاح الحرفي،
الحاجة اللي بتتفلت (بتتفلط) من بين الإيدين والرجلين!
لو كان سمعها من كلام المصريين كان اختصر!
پشش / فشش / فشوش




من أقدم نماذج الكتابة باللغة المصرية (اللغة المصري / اللغة المصرية الحديثة)، للكاتب المؤرخ ابن مماتي، صعيدي مصري (ابن مينا ابن زكريا ابن مماتي)، من القرن 12، كتابه (الفاشوش في حكم قراقوش)، عن الحرية ورفض الظلم، وطلب العدالة الاجتماعية، كان سيرة ابن مماتي بترصد سبب مهم من أسباب تحول مصريين كثير من المسيحية للإسلام، بإختصار (أكل العيش مر)!

لو ترجمنا معنا عنوان كتاب ابن مماتي، ممكن يكون كده:

(التوهان والضياع نتيجة ظلم الوزير قراقوش)!

2025 / 1 / 19

1714 حبل الوصال خليه واصل



الكلام عن الحضارة المصرية بمعجزاتها وسبقها الحضاري
مش كفاية خالص!

أنا عارف وفاهم إننا أول أمة وأول دولة وأول جيش
وأول إدارة بمؤسسات، وأول وأول وأول!

بس كل ده ميفرقش كثير بالنسبة للمستقبل!

والمستقبل هو الأهم!

عشان يكون لك مستقبل ناجح، لازم يكونك حاضر

واعي وماضي بتتواصل معاه ف كلامك وسلامك، من

وقت صحيانك لساعة منامك!

مش تروح تستورد ماضي يمسحك ويتفهك ويحبك ويورطك ويخليك

شخشيخة ف إيد غيرك؟

إنتو فاكرين الغرب والشرق منبهرين بينا دلوقتي بس عشان الآصار (الآثار)

الجميلة بتاعت جدودنا اللي مالية المتاحف؟

- أبدن، دول شايفينا زي ما بيدشوفو الهنود الحمر والأبورجين!

الهنود الحمر عندهم حضارة قديمة عظيمة بارضو، لها معجزات فلكية وعلمية

ومعمارية خطيرة!

إنما الهنود الحمر حبل الوصال بتاعهم إنقطع، أو إتقطع حتت، بسبب مين

وليه، مش مهم!

إحنا كمان قطعنا جبل الوصال مع حضارتنا القديمة، إنقطع ولا إتقطع،
بارضو مش مهم!

بس إحنا كمان بنتصرف زي الهنود الحمر، تفكيرنا هنود حمر، كثير من عاداتنا
متخلفة، زانقين البنات والستات ف خانة الخدامة الجارية، شعرها حرام
وصوتها حرام وشهادة العظيمة فيهم بنص مقام أتعس وأخيب وأجهل
راجل، منعرفش ناخذ قرار غير لما نشاور الكاهن، وإوعاك تفكر أو تختار
لوحذك أحسن تحش النار، حروفنا اللي بنكتب بيها بدائية، عاملين لغة مهجورة
(مفيش ولا شعب بيتكلمها صح) أجنبية هيه اللغة الرسمية بتاعتنا، هنود حمر
هنود حمر، هنود حمر، أصلي يعني!

- طب نعمل إيه؟

بسيطة خالص، نرجع نوصل المقطوع

عندنا قيم الماعت ومبادئ الضمير، نلخصها وننشرها
عندنا لغة شعبية حية ومتداولة، كاملة بكل قواعدها وألفاظها، يبقى نرجع
نعترف بيها وندرسها

عندنا نتيجة (تقويم) بتاعتنا، تبقا هيه الأساس!

عندنا هدوم الوصال مع حضارتنا القديمة، نلبسها ولو ف المناسبات والرسميات!

- إقلع أم البدلة والكرافتة، وإلبس الجلاية البلدي!

عندنا أعياد مصرية جميلة، نرجع نحياها!

الستات يمدو جبل الوصال مع تاريخ جداتنا الملكات والكاتبات والطيبات،

حتشبسوت وسيدشات ومريت بتاح!

والرجالة يمدو جبل الوصال مع جدودنا الملوك العباقرة المؤدين، تحتمس
وإيحتب وبتاح حتب!

عندنا حاجات ووسائل كثير نقدر نوصل بيها الجبل اللي إنقطع!
هوه ده المهم دلوقتي، وإلا هنفضل محطوتين ف سبت واحد مع الشعوب اللي
عايشين حوالينا، ومكتوب ع السبت:

هنود حمر نمـر 1 - هنود حمر نمـر 2 - هنود حمر نمـر 3 .. نخ!

2025 / 1 / 28

1715 ربنا ينتعك بالسلامة

تقوم واحدة من ضحايا مدارس التعريب، تصحح:

ربنا يقومها بالسلامة!

من نجاحات حملة التعريب، التنصل من الكلام المصري الأصلي، ولو بالغلط!

- يعني كأن "نتع" = "قام"؟

أظن دي ترجمة مختصرة، واختصارها ظالم للأصل!

بارضو من نجاحات حملة التعريب، إن كلام مصري كثير بقا يتقال بس ف
مناطق محدودة!

يعني كلمة "ينتعك بالسلامة" بتقال بس للست الحامل، اللي حملها ظاهر أوي!


وتصاريفها بتقال شتيمة جنسية: "منتوع" / "منتوعة"!

و"ينتع" الأكلة لوحده!

مرة كنت ف عزاء، والشيخ اللي بيقرأ صوته حلو، لقيت واحد فلاح بيرد عليه:
"إنتع يا سيدي إنتع!"

لو شوفنا أصل الجدر "نتع" هنلاقيه خاص بالطقوس والمراسم، وهنا التعليق ع
القراية والتراتيل طبعي!

ويبقا الدعوة للست الحامل، شاملة طقوس الحمل والولادة!
وتبقا الشتيمة إياها، معناها الإستغراق والشمول، مش حاجة طياري!
واللي يقدر "ينتع" الأكلة، يعني بكل مشتملاتها!



يبقا "نتع" تعبير طقوسي شمولي، مش مجرد شال ولا حط ولا قام ولا أكل،
وخلاص!

- ربنا ينتعنا، من شرور مدارس التعريب، ونرجع لمصريتنا بالسلامة!

2025 / 2 / 7

1716 قصر

قصور

مقصورة


مقاصير

أقصر

حتا "قصرية" الزرع!

المعنا الأصلي من الجدر المصري المكتوب بالهيروجليفي =

قرية/ بلد صوغيرة/ بيت ريفي/ بيت مخصوص/ بيت متحوط بالزرع .. نخ

qathre-t  village,
قصر
small town ; Heb. קָרִית,

فاضل إيه؟

- كلامنا قواعده (نحو وصرف) مصري

- الألفاظ، أكثرها مصري

- العادات اللغوية بتاعتنا مصري

يبقا ناقص إيه؟

نعتز بكلامنا، وندافع عنه

2025 / 2 / 11

1717 صبي

القراءة الحرفية بتظلم الواقع، وبتضيق العقول!
والقراءة التصريفية بتعدل المايل، وبتقدم الحلول!
طبقها ف كل حاجة، ف قراءة النصوص



القانونية والمقدسة

ف اللغة، القراءة الحرفية بتعمل جرايم
كثير، وأهم جرايمها فصل الواقع عن
أساسه وجدره القديم!

قبل كده، عرضت الجدر "صبا sba" اللي


هوه اسم مدارس الأطفال ف البرابي القديمة، واللي اتصرف منه كلام "صبي"
و"صبايا" و"صبيان"، وارتبط مصطلح "الصبي" بالتعليم لأي مهنة، ومنها "صبي
المكوجي" و"صبي الجزار" .. نخ!

دلوقتي بعرض جدر تاني، صريح ومباشر بمعنا الطفل الصغير، بالنطق
التصريفي: "صبي"!

ولو استسلمنا للنطق الإصطناعي الإصطلاحي الحرفي، هيتنطق: "سفي / صفي"!
المعنا واضح، وقاعدة التصريف (شقلبة الي مع الفه) واضحة، يبقا -ف كل
المجالات- نخلينا دايمن مع المفاهيم والقراءة التأويلية الاستدلالية التصريفية،
ومنستسلمش للقراءة الحرفية، لأن الاستسلام كسل وإهمال!

2025 / 2 / 21

1718 غنوصية



غنوصي

غنوصيين

مصطلح أصله من مصر

وصف للكهنة المصقفين (المثقفين)

غن-صاو

غن-صاة

غن-وصا

المصطلح دخل الاغريقية والفارسية والعبرية

وصف لجماعات المتنورين (العلمانيين)

الجماعات الغنوصية معظم أفكارها من مصر القديمة

2025 /3 /1

1719 زلق

مزلقة

مزلقان

زحلق



زحلقة

زحليقة

لزق


لزقة

ملزوق

زرق

* الجدر "زلق"، بمعنا المكان الناعم المبلول بالمائة

ترجمة القاموس مش دقيقة، ومش ماشية مع معاني التخصصات اللي ف الكلمة.



الكلمة منها بالتصريف (ثلج/ سلج/

تلج)، وكان لسه موجودة معانا

بنوصف بيها المكان اللي فيه طينة

سايية، ناعمة أو رطبة!

أرض مزلقة، يعني ناعمة وفيها مائة

ومنها تصريفة "مزلقان"، النقل بين

القضبان بنعومة، بقت وصف مصري خالص لمناطق تقاطع قضبان السكة

الحديد!

* كان من نفس الجدر اتصنع فعل ملزوق أو مضموم، بالعربي يسموه: فعل

التزاق، عبارة عن فعلين بيتلزقو ف بعض، ويطلعو فعل جديد، بنطق جديد

ومعنا جديد.

الفعل الملزوق: زحلق (زاح + زلق)، ومنها الزحلقة والزحليقة!
 * بارضو بقاعدة اللخفنة، يعني تبديل الحروف، يطلع الفعل: لزق، ومنه اللزق
 واللزقة والملزق والملزوق .. نخ!
 * كان لسه معنا الفعل "زرق" بحالته، بمعنا الدفع بقوة وبنعومة .. "زرء"
 تصريفة بحري، "زرج" تصريفة قبلي.
 والفلاحين يعرفو كلمة "زاروق"، يعني قناية صوغيرة ضيقة بتصرف مائة الري.
 2025 / 3 / 5

1720 أوطه




جبته النهاردة، اتنين ونص، بعشرة جنيه
 الأوطه دلوقتي جميلة وسعرها رخيص
 من حوالي شهر كان الكيلو بتلاتين!
 أنا ركزت بقا مع كلمة "أوطه"!
 لقيتها مكتوبة بالهيريوجليفي، ونطقها التصريفي:
 أوطا

وكان مكتوبة بالقبطي
 فلهيريوجليفي معناها فاكهة أو خضار لونه برونزي!
 رغم إن الطماطم أصلها واسمها مكسيكي، إنما المصريين ادولها أقرب إسم
 مصري: "أوطه"

نفس الحكاية عملها المصريين مع الـ "كرب" و "القصبة"

2025 / 3 / 11

1721 رصد



يرصد

مرصود

أرصاد (هيئة الأرصاد)

الرصد، المتابعة اليقظة

مخصص العين الصباحية، وبعدها

مخصص الليل

* يعني الحراسة بالليل

* ويعني العين السهرانة، الوصف اللي بنقوله دلوقتي واحنا بنوصف ولادنا ف

الأمن وف سينا وع الجبهة

بارضو الجدر ده، نموذج كويس:

* للنطق الإصطلاحي: رسوت

* وللنطق التصريفي: رصود

الراصد والراصدة والترصد والمرصودين


كلها تصارييف من جدر مصري قديم



من غير جدور، مفيش لا فروع ولا ورق ولا زهور

ومن غير تاريخ، الحاضر مكسور والمستقبل مجهول

2025 /3 /16

1722 يوم الصدفة

step  to select, to choose; Copt. *cwtā*.

stepu  a chosen person or thing;  picked words;  selections from a book;  choice bread;  the pick of the stable;  a bag of fine linen garments;  Shipwreck 94, the choicest of Egypt;  IV, 390, selected in olden time.

step  the name of the 20th day of the month.

أيوة، كان عندنا "ليلة قدر"!

بس كل شهر

وبالتحديد كانت ليلة يوم واحد وعشرين ف الشهر

كل شهر مصري فيه ليلة (بخصص العيد)، زي ليلة القدر

اسمها ليلة الصدفة

ليلة للموعودين المختارين

حاجة كده زي اليانصيب

- بتنزل بركة للموعودين المحظوظين المختارين، مرة واحدة كل شهر!

بالنطق الاصطلاحي: ستپ / ستپا / ستپو

بالنطق التصريفي: صتف / صتفا / صتفو

حراس الهوية الحقيقيين (الفلاحين) ينطقوها: صطفه!

بمخصص الأعياد، يوم 20 من كل شهر، ليلة الـ "صتفا"!

واليوم ف الشهر المصري، يبدأ من طلوع الشمس، يعني عكس اليوم اللي يبدأ

من نص الليل!

تبقا ليلة يوم 21 بحسابتنا دلوقتي، هيه ليلة القدر بتاعت جدودنا المصريين!

بس دي ليلة بتتكرر كل شهر (ليلة واحد وعشرين)!

* أول آخر عاشورة ف الشهر!

- بتنزل بركة للموعودين المحظوظين المختارين، مرة واحدة كل شهر

كان يوم حبك أجمل صدفه

صادف / صادفت / مصادفة

2025 / 3 / 20

1723 هرم .. أهرامات

احنا اللي اخترعنا الهرم

الأهرامات فكرة فلسفية

مباني بتلخص فكرة دينية عن البداية والخلود!

كلمة "هرم" اللي بنقولها دلوقتي منحوتة من:

• اسم أبو الهول = حر-م-آخت!

- رايحين ال "حر-م"، جاينين م ال "حر-م"! أو

• وصف لشكل الهرم، المقفول من الأربع جهات:

- مقفول = هرم!

• الإسم القديم الرسمي للهرم بارضو من وصف الميل:

- المبنا المايل = mir / مير / ميل = الهرم!

• صاحب الهرم الكبير: الملك خوفو (حوالي 2650 ق.م).

• وزير التعمير (المشرف الملكي): عنخاف (أخو الملك).

• التصميم والاستشاري: حم-ايونو (مهندس وكبير الكهنة).

دليل ان البنانيين والعمال فلاحين مصريين:

• مدينة العمال: جنوب شرق هضبة الهرم.

بيوت ومخازن، و3 شوارع كبيرة، ومباني إدارية، وأربع صالات ضخمة للنوم، ومستوصف، وصلات للأكل، فيهم:

- دلائل العلاج والتغذية

- دلائل المرتبات والتعويضات والمكافآت.



- دلائل الأجازات، وأسبابها.
- برديات البحر الأحمر - وادي الجرف.
- 10 برديات سليمة، تعتبر أقدم برديات!
- كاتب البرديات "مرر" بعنوان "يوميات مرر"، يعني أقدم مؤرخ!
- بتوصف مهمة كتيبة مصرية ف شحن مستلزمات لبنا الهرم الكبير!
- يعني لا فضائيين ولا عماليق ولا عبيد ولا جن ازرق!
- نقوش وادي مغارة "ختا-مفكات" - جنوب سينا.
- بتوصف مهمة كتيبة مستلزمات المباني، الفيروز والنحاس والأجار الكريمة،
- كاتين اسم الملك "خوفو"!
- يعني الفكرة مصري!
- والاسم مصري!
- واللي صمم مصري!
- واللي نفذ مصري!
- وكان الخانات مصري!

2025 / 3 / 27

1724 الحيسيين (الحيثيين)

الحثيين

الخثيين

الثلاث أسامي اللي فوق دول، حاجة واحدة

يعني تسميات مختلفة لشعب واحد

ده الشعب القديم اللي كان ساكن تركيا الحالية قبل غزو واجتياح القبائل

التترية، اللي منهم العصمانيين (العثمانيين)، من حوالي ألف سنة!

كان منهم عشيرة ضمن عشائر الهكسوس: "ختيا"!

العجيبة بقا ان عاصمتهم "خاتوشا" ودولتهم

ومملكتهم الأناضولية، مظهرتش للوجود ف

كتب الآثار والتاريخ، إلا بعد طرد الهكسوس

من مصر!

الشعب نفسه كان اسمه بلغته: حتي / حاتي!

اسمهم بالمصري القديم: حتي!

اسمهم باليوناني القديم: حتي!

اسمهم بالعبري: حيسي (حيثي)


كان منهم عشيرة ضمن عشائر الهكسوس: "ختيا"!

خلوني أكرها ثاني:

العجيبة بقا ان عاصمتهم "خاتوشا" ودولتهم ومملكتهم الأناضولية، مظهرتش

للوجود ف كتب الآثار والتاريخ، إلا بعد طرد الهكسوس من مصر!

2025 / 3 / 28




1725 الغالي علينا غالي

عندنا أسامي مصرية أصلية: غالي وغالية
ربنا يرحم الدكتور بطرس "غالي!"
والحاجة بقت "غالية"
والتجار بقو ييست "غللو" الظروف!
والـ "غل" خلاهم يحرمو الموسيقى والفنون ويضيقو الناس ف عيشتهم (أكيد
عارفينهم!)
وأدينا قاعدين بنتكلم وسايين الأكل ع النار بـ "يغلي!"

طلب مستعجل:
بالذكاء الصناعي

1- تسجيل كل كلمة مصرية
2- بصمة رقمية لكل رمز



kherit 

 what one needs, i.e., provisions, means
of subsistence; Copt. ⲕⲣⲉ, ⲕⲣⲉ.

اللغة المصرية، كلها فلسفة
مجرد ما تغوص مع الكلمة، وتشوف أصلها وتصاريفها، تعرف فلسفتها
ووظيفتها!
شوفو كده الجدر المصري القديم ده:

- بالنطق الاصطناعي الاصطلاحي الحرفي:: "غريت"، معناه = الاحتياجات الأساسية الضرورية!

- بالنطق الطبيعي التصريفي الصوتي:: "غالية"، نفس المعنا = الاحتياجات الأساسية الضرورية!

أعظم حكمة طبيعية، ان الي احتاجه بس، هو ده الغالي!

- الي منش محتاجه، غالي ولا رخيص، ميلزمنيش!

والي اكتر من الاحتياج، يبقا "غلو" و"غليان"!

والي يمنع عنك احتياجاتك الأساسية الضرورية "استغلاي"!

- بدمتكو، فيه لغة بالأصالة والبلاغة والفلسفة دي تنساب وتنهل، وينقال عليها "عامية"؟

بمناسبة البوست ده، وحلاوة البوست ده

بحي علامة اللغة المصرية القديمة "ألن جاردنر"، لأنه سبق وعمل حاجتين مهمين:

1. نظم قواعد (نحو وصرف) اللغة المصرية القديمة Egyptian Grammar!

2. جمع رموز الكتابة المصرية، وسجلها بأرقام ف "قائمة جاردنر".

وبمناسبة الي وصلنا له دلوقتي ف عالم الديجيتال والذكاء الصناعي، عاوزين نكل مشوار "ألن جاردنر" ونعمل حاجتين:

1. توثيق كل كلمة مصرية قديمة، وتسجيلها بسجل رقمي.

2. عمل بصمة وراثية رقمية لكل رمز (حرف) مصري قديم.

مين بقا الي يقدر يعمل الحاجتين دول، وبسرعة؟

- لازم مؤسسات كبيرة، زي مكتبة اسكندرية، متحف الحضارة، المتحف الكبير .. نلخ

2025 / 3 / 30

1726 ناشف



المصريين بيقولو:

دماغه ناشف

الهدوم نشفت

فوطه ناشفة

نشف، ينشف، تنشف، ناشف، ناشفة،

ناشفين، متنشفين، نشافة .. نلخ!

كلام مصري أصلي

ف العربي = يابس / جاف / ناضب

نشپ / نشف = تنفس الهواء / هوا / هوا ناشف من غير بخار .. نلخ!

كنايات كتير من الجدر "نشف":

كلام ناشف = من غير مجاملات

شغلانة ناشفة = بللوشي / ببلاش!


أكلة ناشفة = ارديحي، لا طبيخ ولا غموس!

علاقة (رومانسية) ناشفة = لا بوس ولا حضان!

1727 رقم

رقم رقب لقم لقن
 شوفو الجدر اللي ف الصورة كويس
 من أول مرة، هنتكر ان ميطلعش منه حاجة متواصلة مع كلامنا
 لأن نطقه الاصطلاحي "رقن"، يخليه غريب وبعيد عننا!
 انما شوفو يحصل إيه، لما نطبق عليه شروط [#النطق=التصريف](#)
 رqn = رقم = رقب = لقم = لقن
 إزاي يعني؟

رقن = يستقصد (بلؤم / بنية فيها شر)
 رقم = يتجسس (yorqm) بلؤم
 رقب = متابعة / تجسس (بلؤم)
 لقم = التلقم، تأكل بيتكرر بالعافية (فيها استقصاد بارضو)
 لقن = غشش، التغشيش استقصاد التزييف



أكيد فيه تصارييف تانية من نفس الجدر، وده لأن "النطق التصريفى" مش
 ف اتجاه واحد وحيد، وإلا هنرجع لعيوب [#النطق=الاصطلاحي](#) .

والأضمن اننا نعيد ثاني التلات شروط بتوع #النطق-التصريفى-الحركى :

• تطبيق قواعد علم الصرف (شقلبة / لخنفة/ اهمال/ زحلقة .. نلخ).

• استمرار الحروف السابطة (بتصاريفها) ف الجدر وتصاريفه.

• تواصل دايرة المعنا، ف الجدر وتصاريفه الكثير.

كمان نفكر بعض بقاعدة التصريف بالشقلبة، يعنى بتغيير نطق الحروف، صوت حرف بدل صوت حرف تانى.

وشقلبة الحروف مش عشوائى، إنما لها قواعد زي ما قلنا قبل كده، وأهم قاعدة فيهم، طلوع صوت الحروف من مخرج صوتي واحد.

فيه تفاصيل كتير ف حكاية مخارج الصوت دي، ولها مراجع تعدي الألفين صفحة، انما ممكن نلخصها ونطبقها بنفسنا ف أربع مناطق:

• الحلق

• سقف الحنك

• طرف اللسان

• الشفايف

الحلق، يعنى الزور، أبعد مكان ف الجهاز الصوتي، جرب بنفسك صوت الحروف اللي بتطلع منه بالترتيب من الأبعد للأقرب:

همزة (ءه)/ هاه - حاه/ عاه

سقف الحنك:

قاف/ كاف/ جيم/ ي

فوق طرف اللسان:

ره/ لام

تحت ووسط طرف اللسان:

سين/ زين/ شين/ صاد/ ضاد/ دال/ ته/ طه

الشفاف:

ميم/ به/ نون

وانتا مغمض كده، تقدر تجرب، هتلاقي كل حروف المخرج الواحد بيتشقلبو

مع بعض

يعني الجدر "رقن"، بيتصرف منه: "رقم"، و"رقب"، و"لقم"، و"لقن"، ليه؟

- لأن حرف النون، بيتشقلب مع الميم ومع البه

- ولأن حرف الره، بيتشقلب مع اللام

- ولأن كلهم من نفس دايرة المعنا، اللي هوه الاستقصاء بلؤم!

2025 /4 /5

1728 أبو الهول

اسمه كده من الأول


يعني المصريين هوما اللي سموه أبو الهول

سيبك م المكتوب ع النت، لا عربي ولا يوناني ولا كنعاني ولا ولا

الفن مصري أصلي، والاسم مصري أصلي:

هول = الجليل / عالي المقام

هول = الكاهن الأعظم
 أبو = أداة اضافة مصري أصلي
 - يعني من البداية اسمه ووصفه مصري
 حتا الجدر اللي فيه حرف الحه "حول" نطقه التصريفي ف نفس المكان والزمان
 "هول"، كمان النطق بالحرف القبطي: هول!
 احنا عادي خالص بنشقلب الحه واله ف كلامنا: هكتب/ حكتب - هعمل/
 حعمل - هاكل/ حاكل!
 اللي يغيظ من بتوع النطق الاصطلاحي بقا ان رمز الأسد بيتنطق (ل) لام
 صريحة أيحة، وبارضو بيكتبوها (ر)!
 - عرفتمو #النطق التصريفي مهم أد إيه؟




جسم أسد ورأس الملك خضرع
 باصص وحارس ناحية الشرق (معظم الغزوات والاحتلالات والطعنات
 والخيانات جتلنا م الشرق)
 الطول: 73 متر (يعني كأنك عامل مقطورة بطول عشر أتوبيسات كبيرة)
 العرض: 19 متر

الارتفاع: 20 متر (عمارة خمس أوست ادوار)
التشويه اللي ف وشه ومناخيره بفعل متعصبين مسلمين، معاهم شيخ سلفي من
القدس، اسمه محمد صائم الدهر!
2025 / 4 / 6

1729 الهكسوس / 3

"ان هؤلاء المغتصبين لم يهبطوا على البلاد فجأة، فاستولوا عليها كما يزعم
المؤرخون، ولكنهم تسربوا اليها ببطء وعلى مهل .."
ده وصف الدكتور سليم حسن ف رابع جزء من موسوعته، لصورة التواجد
الهكسوسي.
بنفس الطريقة اللي بدأت بيها كلامي عن الهكسوس / 1 ف أول بوست، انه
بدأ بتسرب وتسلل واستضافة، اتطور لاغتصاب أراضي واستيطان واحتلال
مناطق، وبعد كده من أول الأسرة تلتاشر بقا احتلال كامل لأراضي الدلتا،
وفرض الجزية! وبقا عندنا أسر حاكمة هكسوسية عاصمتها أواريس، وأسر
مصرية وطنية عاصمتها طيبة!



يعني التسلل والتسرب الاستيطاني، بدأ من أواخر الأسرة العاشرة الي آخر ملوكها "مري-كا/ مليكا" كان من أم هكسوسية، وان ده بالتحديد كان السبب الرئيسي لزوال الحكم الاهناسي وبداية الحكم التوحيدي الطيبي بقيادة الملك "منتوحتب"!

كانت من أهم انجازات ملوك الأسرة الطيبية (11) انهم رجعو وحدة البلد وهيبته وجمو تأثير الآسيويين (الهكسوس) الي انتشارو ف شمال وشرق مصر، وزادت علاقاتهم الاجتماعية والتجارية مع المصريين!

بس للأسف، ده ممنعش ان الي حصل مع "مليكا"، نهاية الأسرة 10 يتكرر ثاني مع ملك من ملوك الأسرة 11، الي اتجوز واحدة هكسوسية، وقام بتجنيد أفراد من الآسيويين ف الجيش المصري، واستعان بيهم ف حملاته العسكرية! يعني التواجد الهكسوسي قبل الاحتلال الصريح للدلتا (أسرة 13)، كان معروف وفيه تنبيهات وتحذيرات منه، أهمها الي معروفة باسم "نبوءة

نفروروهو"، مكتوبة ف بردية اسمها "بردية بطرسبورج" باعتبار ده الإسم القديم لمتحف ليننجراد.

نبوءة "نفروروهو" دي، مكتوبة ف عصر الملك "أمنمحات 1" 1970 ق.م، كلها كلام تخويفي وتحذيرات صعبة، عن اختلاف الأخلاق وارتكاب المحرمات ومخالفة القوانين، بسبب زيادة الانتشار وقوة نفوذ اللاجئيين المستوطنين الآسيويين، بعبارات حزينة:

"اسمع يا قلبي وانعي أرضي أرضي الي اتولدت فيها .."
وينهيا بوصف أدبي:

"بفكر ف حالة أرض وطني، لما هينتشر الآسيويين فيها بقوتهم ونفوذهم، لدرجة انهم هيعذبو قلوب الحاصدين (الفلاحين) ويغتصبو بهائمهم وقت الحراثة"
الكلام ده يا جماعة ف عز قوة الدولة المصرية، الأسرة 12 والملك أمنمحات، معناه إن التواجد والتسلل والتسرب الاستيطاني كان ملحوظ، وكان فيه توتر وقلق وانعدام الأمن، وخناقات متفرقة بين المصريين والمستوطنين الهكسوس، أقواها وأشهرها حصلت قبل نهاية الأسرة 11، ودي الي بقت حدوة الحوادث، الي لسه ماثرة ف حياتنا لغاية دلوقتي، أقصد قصص الصراع الي اتحككت ف التوراة والانجيل والقرآن، عن النبي موسا والملك فرعون.

- دي بقا هتكلم عنها ف فيديو مخصوص!

دراسة الهكسوس، مهمه لتفسير قصص كثير دخلت حياتنا، ومهمة لتفسير التشابه اللغوي مع الدول الي أساسها من عشائر الهكسوس، ومهمة أكثر للعصر

الحالي، اللي أعداد اللاجئين المستوطنين فيه بقا حوالي عشرة مليون، يعني كأن التاريخ بيعيد نفسه!

2025 / 4 / 7

1730 طقم



يا واد يا مطقم
كلمة "طأم"، أصلها المصري، زي
مايقولها البحارة

جدرها الهيروجليفي: "طأم"، والهمزة
بتتصرف مع القاف والجيم.

تصرف الهمزة مع القاف والجيم،

حسب قاعدة زحلقة الأصوات من مخرج صوتي لمخرج صوتي ثاني.

اقروها بالتفصيل اونلاين ف كتابي بنتكلم مصري.

يعني تقول: طأم

أو تقول: طقم

أو تقول: طجم

كله مصري أصلي

الطقم هو اللفة الكاملة، أو اللبس الكامل

تمشي مع العباية أو البدلة أو التايير
بقت كناية عن أي طقم كامل

طقم هدوم

طقم بكيات

طقم معالق

طقم سنان

طقم فضية

طقم حكام

طقم اقلام

طقم ملايات سرير .. الخ

2025 /4 /11

1731 لعلع

الشيخ بيقرأ، وصوته به "لعلع"


- أم كلثوم "لعلت"!

كلمة "لعلع" و"لعلعة" معناها المصري الأصلي = جاب م الآخر/ عمل أحسن
حاجة

كأن القاموس جاب كلمة "جلجل" وحطها معاها، عشان يقرب المعنا!
لو سمحت:

لما تحب تعرف أصل كلام مصري، متقارنوش بالعربي، لأن مينفعش تقارن الأصل بالصورة.

مصر هيه الأصل، وكلامها هوه أصل كلام المنطقة كلها!



الكلمة حسب #النطق الاصطناعي الاصطلاحي الحرفي = عرعر (جاب م الآخر/ عمل أحسن حاجة)

نفس الكلمة حسب #النطق الطبيعي التصريفي الحركي = لعلع (جاب م الآخر/ عمل أحسن حاجة)

النطق التصريفي الحركي، طبق قواعد علم الصرف، وبمجرد ما طبق قاعدة الشقبة وقاعدة اللخفة، المعنا بقا واضح لأي مصري من غير حتا ميشوف ترجمة أو شرح القاموس!

يبقا لازم كل اللي بيشرح الهيروجليفي بالنطق الاصطلاحي، يتعلم كمان النطق التصريفي!

وبلاش حكاية ان جدودنا كانوا بينطقو كده، حضرتك تقصد انك اتعلمت كده، ومش شرط اللي اتعلمته يكون صح.


كأن شوف ف الصورة النطق القبطي لنفس الكلمة، نقل النطق المصري الطبيعي، يعني رتب الحروف صح، بدأ باللام، انما بارضو قدرته محدودة بسبب النطق اليوناني اللي مقيدة القبطي لغاية دلوقتي، معندوش حرف العين! القبطي مش آخر مرحلة، كلامنا الحالي هو آخر مرحلة، ونطقنا الحالي أقرب نطق لجدودنا!

المصريين مغبروش لسانهم، ولا عاداتهم اللغوية، تقديس العادات اللغوية الأجنبية جريمة مستمرة (ف حق الهوية المصرية)!

2025 /4 /21

خضة 1732

عليا الطلاق بالتلاتة، انتا "اتخضيت"!




- اتخض، يعني انزعج (انجزع)!
- الخضة، لحظة العلاج ف الزار!
- الخضاضة، أداة خض اللبن!
- مخضوض، مخضوضه، مخضوضين!

الخش، الخوف الشديد من كارسة (كارثة) أو مصيبة!

2025 /5 /2

1733 عاش من شافك



Gardiner's list codes
D36:N35:N37
Transliteration
nb
Translation
Life



āsh  Anastasi I, 17, 2, meals, food.

عاش 

حرف العين، من أوضح أصوات كلامنا المصري

يعني من أساس عاداتنا اللغوية، من القديم للحالي

طب حرف العين اختفا من الكتابة القبطي ليه؟

1. عشان الكتابة القبطي، صناعة يوناني، ظهرت مع البطالمة!

2. الكتابة القبطي التزمت بالعادات اللغوية اليونانية.

3. المصطلحات اليوناني فرضت نفسها ع المصطلحات الحياتية والدينية

القبطي.

واليونانيين نشرو الكتابة القبطي ليه؟

- عشان يقدر يفتاهمو مع المصريين.
- أي قاموس هيروجليفي، هتلاقي حرف العين واخذ فيه مكان كبير
- تخيلو لو سمعنا كلام بتوع (القبطي آخر مرحلة) مكاش هنتواصل مع كلمة
- العيش يعني الأكل، ولا كلمة العيشة يعني الحياة!
- القبطي مرحلة كتابة نقلت كتير من كلامنا المصري، بس بحروف وعادات
- ومصطلحات يوناني!
- آخر مرحلة للغة المصرية، هيه المرحلة الحالية اللي بنتكلم بيها دلوقتي.
- اللغة المصرية عمرها ما انقطعت!
- الكتابة اتغيرت، انما اللغة مستمرة
- كلامنا ف لساننا، مش ف حروف الكتابة
- كلامنا متواصل من آلاف السنين!
- عاش يعيش عاشو
- 2025 / 5 / 3

1734 سندان

سندان الحداد، كتلة حديد صلب، يبسند عليها!

ممکن نقول سندان، أو سندان، الاتنين واحد، زي سماعين واسماعيل!

السندان هو هو الصلاة، صلاة الهون، وصلاة نارمر أصلها سندان لدق

الكحل!

سندان من الجدر المصري اللي ف الصورة: "سند"، يعني أساس!



السندان أساس قوي يعتمد عليه

- زي سندات البنك

عشان كده الدليل القوي اللي بنعتمد عليه ف المطالبة بالحقوق، اسمه مستند!

- المحامين بيقدمو للمحكمة الدليل ف "حافضة مستندات"!

2025 /5 /3

1735 هيه

هه هه هيه

هه هه هه هيه




كلامنا جميل وسهل!
 عشان شايل خبرة
 آلاف السنين
 هيه، بنقولها واحنا
 فرحانين

البحار قبل الصوغيرين بيقولوها لما النور يرجع
 هيه

الكلمة مكتوبة بالهيروجليفي من آلاف السنين، ومعناها: هيصة الفرحة!
 2025 / 5 / 9

1736 فرج



الواد خد إفراج
 يعني اتفتحله باب السجن
 ربنا يفرجها
 يعني يفتح باب الرزق
 "فرج"، يعني فتح/ فتحة
 مفرج، وفراج وافراج
 حتا الفرجة، والمتفرجين
 #النطق-التصنيفي-الحركي = فرج

النطق الاصطلاحي الحرفي = برج
 بوستات زي دي بتبين اهمية النطق التصريفي
 المعنا يبيقا واضح بمجرد النطق
 - اوعا تفتكر إن النطق التصريفي للمصري متأثر بالعربي؟
 ابدن، العكس هو الصحيح!
 * اليوناني أثر ف كتابة المصري (القبطي)، وأثر هنا يعني فرض حروفه وعاداته
 اللغوية ومصطلحاته، إنما كلامنا المنطوق استمر وتواصل، بكل لهجاته اللي
 بتظهر ف التصريف!
 * نفس الكلام مع العربي، كلامنا ونطقنا استمر.
 مش عاوز أطول ف التنظير، إنما الخلاصة إن النطق التصريفي مهم، ولازم
 يكون له دور كبير ف الكورسات وبرامج تعليم اللغة المصرية!
 2025 / 5 / 11

1737 زهور

زهرة وزهراء والأزهر
 أصل الجذر المصري "زهرة" = ربة القمر
 الاسم بيصور الظاهرة الفلكية المعروفة بإسم "قمر الزهور"، ف بداية الربيع بيظهر
 وتبدأ معاه الزهور تتفتح!

زهرة
Sehrät 𓆎 𓆏 𓆐 𓆑 𓆒, Ombos I, 46, a
moon-goddess.



مش بس ربة القمر، كان اسم أقرب كوكب للأرض.
النطق الاصطلاحي الحرفي: سهرت
النطق التصريفي الحركي: زهرة
من النطقين تصاريف السهر وكان الظهور!
2025 / 5 / 14

1738 زلزال

شلشلة زلزلة

مش سبق وقلت لحضراتكو:

- "كل كلامنا له أصل من جدور اللغة المصرية القديمة"
لو دورت عن معنا مباشر لكلمة زلزال ف قواميس اللغة المصرية القديمة،
هتلاقي، لأن الزلازل ظواهر طبيعية، والمصريين رصدوها!
إنما وصف الظاهرة له اشكال كتير، ومنها وصف الزلزلة!
وده الوصف اللي تواصل وفضل معنا



Gardiner's list codes
N37:D21-N37:D21-Z9:D40

Transliteration
šršr شرشر / شلشل / زلزل

Translation
Disordered, distracted, upset,
to be perturbed


*النطق الاصطلاحي الحرفي: شرشر = اضطراب
 *النطق التصريفي الحركي: شلشل / زلزل = اضطراب
 شوفتو أهمية #النطق=التصريفي=الحركي؟؟؟
 إحنا مش ف امتحان، الكلمة ومعناها ونسلم الورقة ونجري
 - دي رسالة، عاوزين نعزز احساسنا بالهوية الوطنية ، وأهم وسيلة تواصل
 اللغة!

2025 /5 /14

1739 صاحي

خلي السلاح صاحي صاحي صاحي
 الصحيان والصحصحة، من الارتفاع والعلو والصعود
 كناية الفوقان والانتباه!
 - لسة صاحي م النوم؟


طب صحصح يابني صحصح شوف مين بيكلمك



اوعا يكون تشويه الهوية بيأسر (بيأثر) فيك
إياك تقول إنك مصري بس بتتكلم عربي
هتفضل مدحوك (مضحوك) عليك لإمتا؟
انتا بتعرف عربي وانجليزي وفرنساوي .. نلخ
بس كلامك مصري أصلي، وهويتك مصري
2025 / 5 / 16

1740 .. خسارة/ جاي

خسارة خسارة
فراقك يا جارة
كلمة خسارة صيغة من الجذر "خسر"
خسر، يعني انكسر/ اددعك/ اتمرمط/ ادمر .. نلخ!



تخيلو بقا إن الجدر خسر مش هوو موضوع ولا سبب كتابة البوست
انما السبب إني افكرت كلام كثير حلو خسرناه بسبب التعريب الرسمي
الإلزامي الاجباري!

يعني لو فلاح ف الغيط بقرفته تقع أو غريق ف البحر، يقول: جااي!
بس "جاي"، كلمة واحدة من أعماق اللغة المصرية

- ثلاث حروف، مش مجمع لغوي

كلمة واحدة مختصرة بتعبر عن الحالة وتسعف الملهوف!

أنا عارف إن الكلمة دي لسة موجودة ومعروفة، إنما بقا لها بدايل ضعيفة
ومرهقة

- يعني 'خسارة' ننسا "جاي"، وزيها كلام كثير!

2025 / 5 / 22

1741 تنح / تناحة

الصدیق [Omar AbdalAziz](#) عمل بوست عن أصل كلمة متنح، لقيت عنده مجموعة معترضة، ومش متخيلة شقلبة السين مع الله القاعدة ف المصري إسمها شقلبة، وف العربي اسمها اقلاب والاختلاف مش بس ف الاسم، دا اختلافات جوهريه ف طريقة عمل كل قاعدة!

مينفعش تحاكم لغة بقواعد لغة ثانية!

الشقلبة بيتبدل فيها نطق حروف المخرج الصوتي الواحد يعني عندك حرف الله العربي بيتنطق بالمصري سين، بعد كده حرف السين ده بيتشقلب (حسب العادات اللغوية لكل لهجة مصرية) لحرف الله، فيه أمثلة (أمثلة) كتير:

(ثعلب) سعلب / تعلب

(ثوم) سوم / توم

(ثلاجة) سلاجة / تلاجة


(مثل) مثل / متل (مثل انبارح)

(كثير) كسير / كتير

(حديث) حديس / حديث

يعني الصدیق عمر، مكسرش قاعدة فيساغورس (فيثاغورس)

الجدر المصري الأصلي (سنح)، بالنطق الاصطلاحي



يبقا (تنح)، بالنطق التصريفي
ومعناه مربوط، واقف متنح، يعني زي اللي مربوط
2025 /5 /22

1742 بنكتب حسب قواعد المصري

ضرورة كتابة الهمزة المكسورة
الكلام هنا عن كتابة اللغة المصري
رغم إننا دلوقتي بنسجل كلامنا المصري بحرف نبطي عربي
إنما لازم ناخذ بالنأ، ومنلتزمش غير بقواعد اللغة المصري
اللغة لها قواعد، إنما الحروف مجرد وسيلة لتسجيل اللغة
يبقا نلتزم -بس- بقواعد اللغة اللي بنسجلها
الكلام ده، عشان فيه خلط بين قواعد اللغة المصري وقواعد العربي!

همزة الاستعجاب بالأمر لازم تنكتب، لأنها أداة أمر إتكلم (تكلم) إتعلم (تعلم) إتفاهم (تفاهم) #إحنا مصريين وبنتكلم مصري #بنكتب مصري ملتزمين (بس) بقواعد اللغة المصري سامي حرك	 Gardiner's list codes A26 Transliteration i Translation Oh !
--	--

العربي عنده حالات لكتابة وظهور الهمزة

إحنا ف كتابة المصري، مش ملتزمين بالحالات دي

- حد بيكتب مصري، تطلب منه يلتزم بقواعد لغة تانية؟؟؟ غريبة أوي!

المصري ملتزم بقاعدة تسجيل اللي بينطقه، يعني نكتب زي مابنتكلم!

هنا ف حالة الهمزة المكسورة اللي بتظهر واضحة ف فعل الأمر، لازم الهمزة

تنكتب لأنها أداة أساسية!

- حالات كتابة الهمزة اللي عند العربي دي ملناش صالح بيها!

2025 /5 /23

آدم 1743

- عندنا آدم؟

- أقصد، التاريخ المصري فيه "آدم"؟

أَيُّوَة، عَنَدْنَا آدَمَ

بس ادم بتاعنا، غير ادم بتاع الكتب

المقدسة الابراهيمية!


ادم بتاعنا، اسمه انكتب بالبدال (ادم)

وبالته (اتم) وبالطه (اطم)!

سيبك ان الحاجة بتاع النطق الاصطلاحي زنفه ف خانه (اتوم)، خلينا مع

النص الأصلي، وحالات تصريفه.

- ادم بتاعنا، أول شخص ظهر ف الكون



معنا اسمه (ادم)، الدائم، يعني الدوام من اسمه، وكان معناه الكامل التام،
يعني التمام تصريف من اسمه (اتم)!

- ادم بتاعنا طلع من المحيط الأزلي (نوو/ نوون)

- ادم بتاعنا، اندمج مع الشمس، وبقا (ادم رع/ اتم رع).

- ادم بتاعنا أول ملك ف الكون

كل ملوك مصر يلبسو دقن زي دقنه، ويمسكو عصايتيه!

- ادم بتاعنا، لسه موجود، لأنه دايماً ف كل العصور

متعرفش بقا الأساطير دخلت ف بعضها ازراي، بس ادم بتاعنا أقدم من أي

ادم، واتسجل اسمه وحكاياته قبل ما أي حد يسجل!

2025 / 5 / 23

1744 جزر

الجزر الجزر الجزر

بيقوي النظر

مكنش انعذر ولا باع جزر ولا قاللي آسف واعتذر

الجزر نبات مصري؟

- أيون، نبات مصري، واسمه مصري أصلي!

- دا حتا اسمه العلمي كده *Daucus aegyptiacus*

أصل خلي بالك، كان فيه موضة استقلال بمصر، استقلال من قلة القيمة بعيد عنكو! كل مايتسألو عن حاجة يقولك أصلها فارسي تركي عبري عربي لاوندي .. أي حاجة إلا مصر!


وبارضو موضة كل حاجة استحضرها محمد علي، وبعدين يظهر ان الرز قديم قبل محمد علي والقطن من قبل محمد علي حتا القصب .. كان فيه نهضة أيام محمد علي، وأنواع جديدة ظهرت، بس مصر طول عمرها عندها القصب والرز والقطن، واللي مش مسدأ يروح يقرأ السفنامة بتاع الرحالة ناصر خسرو، وفيه خراج كل المحاصيل دي من سنة 1005 م!



جزرة، جزراية، والجمع جزر
الفلاحين زي بيكسرو الجيم (جيزر)، والبنادرة يفتحوها (جازر) زي بتاعت
سماعين ياسين، أو جميز ف فيلم المليونير!

2025 /5 /29

1745 لطح لطح



جت منين كلمة "لطح"؟

- فلان دا زي اللطح!

- مالك كده واقف زي اللطح؟

أتاري اللطح ده، كان حاجز بيتحط

قدام باب البيت، عشان الخصوصية!

زمان كان الفلاحين بيعملوه من جوالس الطين، ويحطوه قدام البيوت،
عشان ماية الفيضان!

انما حطته قدام البيت، زي مابتجيب الرؤية، بارضو بتعطل الحركة وبتشوه
المنظر!

عشان كده بقت كناية التلطيخ يعني التشوية!

- بلاش تلطيخ بقا إحياء أبوك!

- فوطة مبلولة وامسحي اللطخة اللي ف وشك دي!

ومنها كان تصريفة "لطح"، من الجدر "لطح"، عشان "شقلبة" الحروف اللي
بتطلع من الزور!

ومنها "لطعة"، زي اللطح بتاعت الدودة!

- واقف "ملطوع" عندك بتعمل إيه؟

- وسابها "ملطوعة"، واقفة بتستناه ثلاث ساعات!

2025 / 5 / 30

1746 خالي وخالية

خلا .. خلاء


الأرض الخلاء، يعني الأرض الواسعة الفاضية

أرض خالية، يعني أرض فاضية!

خلا، جدر لغوي مصري (بالنطق الحركي)، معناه منطقة مفتوحة، واسعة، بعيدة، صحرا .. نل!

- النطق الاصطلاحي الحرفي: خر-ت

- النطق التصريفي الحركي: خلا-ت



يبقا عبهليم لما بيغني: يا "خلي" القلب يا حبيبي

يقصد خالي (فاضي) من المهموم

طب وردة لما بتغني: "خليك" هنا "خليك"

بارضو عاوزة الراجل يفضا لها، وميشغلش باله بأي حاجة غيرها

العربية خلا، خلاء، خلو الفراغ، الانفراد، الإخلاء

الآرامية ܫܠܐ (ḫlā) الخلاء، الفراغ

السريانية ܫܠܐ (ḫlyā) فارغ

العبرية ַחֲלָל (ḫalāl) ميت، خالٍ

أرجع تاني أقططم ف الجماعة اللي فاكين اللغة المصرية مجرد وردة ف عروة
الجاكتة

- اللغة المصرية مش نوستالجيا طفولية نفتكرها سواني ولا دقائق!

لا يا محترم، اللغة المصرية طريقة حياة!

اللغة المصرية أساسية للمستقبل، لأنها أساسية للهوية المصرية

ومفيش مستقبل واعد، من غير إحساس بالهوية جامد

يبقا بلاش كل ما تيجي سيرة اللغة المصرية نحصرها ف خانة: تاتا وهم وامبو

ومم وننه وواوا وأوبج!

اللغة المصرية يعني كلامنا كله، قواعده وألفاظه وأصواته وعاداته اللغوية!

الي بنتكلمه دلوقتي جدوره من أقدم مراحل اللغة المصرية، قبل العربي

والانجليزي والفرنساوي!

2025 /6 /1

1747 لبن



يجعلها سنة "لبن"

لبن

كلمة مصرية أصلية

قراها الخواجة، بالنطق الاصطلاحي: بنر

وصحتها بالنطق التصريفي الحركي: ربن / لبن

- حصل إيه ؟

كل الحكاية إننا نتعامل مع اللغة باعتبارها كيان حي، مش حجارة جامدة!

اللغة بتتلون وبتتشكل وبتتغير حتا ف الزمن الواحد

شقلبة وخلفنة الحروف من أساسيات قواعد علم الصرف

والصرف ده هو اللي مسئول عن اختلاف اللهجات

المصريين بيتكلمو لغة واحدة، بتصاريف مختلفة، يعني بلهجات مختلفة!

- تصريفة الجذر "لبن"، جت ف اللغة المصرية القديمة، بمعاني كتير، زي

sweet حاجة حلوة، ووصف لماية النيل، وكان جت بمعنا مباشر وصریح زي

الي ف الصورة: لبن milk

- أهي كلمة واحدة زي دي، معناها = لبن milk

بتبين أهمية طريقتنا: [#النطق_الحركي](#)

القاموس كان لازم يقرأها بأكثر من طريقة حسب علم الصرف

الره بتتشقلب مع اللام ، عادي خالص

والحروف بتغير مكانها (لخفنة)، بارضو عادي خالص!

2025 / 6 / 1


برشامة 1748

حبوب الدواء، برشام

كناية من جدر مصري بمعنا زي حبوب الدرة

النطق الاصطلاحي الحرفي: برشامعت

النطق التصريفي الحركي: برشامت / برشامة



شوفو لما بعت استفتي Grok قال إيه:

برشامة

حبوب الدواء، برشام

كناية من جدر مصري بمعنا زي حبوب الدرة

النطق الاصطلاحي الحرفي: برشامعت

النطق التصريفي الحركي: برشامت / برشامة

شوفو لما بعت استفتي Grok قال إيه:

الكلمة "برشامة" أو "برشامعت" في قاموس بادج الهيروغليفي، معناها مرتبط بحبوب الذرة (grain of the South، dhurra)، وده واضح من الرموز الهيروغليفية اللي في الصورة (زي رمز الحبوب والنبات). في السياق المصري القديم، الكلمة دي كانت بتشير للحبوب بشكل عام، وبعدين اتطورت في اللهجة المصرية الحديثة لتعني "حبوب الدواء" ككناية، زي ما قلت. لكن ليه جوجل بيقول إن "برشامة" أصلها فارسي من "برجانة"؟ هنا ممكن نلاقي تفسيرين: تشابه صوتي وتداخل لغوي: كثير من الكلمات في اللغات المختلفة بتتشابه صوتياً من غير ما يكون في علاقة أصلية بينهم. "برجانة" الفارسية (الي معناها مختلف، وغالبا بتشير لشيء زي "البرج" أو "القلعة" حسب السياق) ممكن تكون اتلخبطت مع "برشامة" بسبب الشبه الصوتي. قاعدة الصرف والمعنى مختلفين تماماً، فده بيضعف الاحتمال ده.

جوجل بيعتمد على مصادر متنوعة، وممكن يكون اللي بيظهر في البحث ناتج عن مصدر قديم أو غير دقيق.

الأقرب للصحة: حسب أصل الكلمة الهيروغليفي "پر-شما-ت" (per-shema-t) اللي واضح في القاموس، وتطورها في اللهجة المصرية لـ "برشامة" بمعنى حبوب الدواء، الأصل المصري القديم هو الأرجح بكثير. الكلمة دي لها جذور واضحة في اللغة المصرية القديمة، واستخدامها في سياق الحبوب منطقي جداً مع تطور المعنى. فالأصل الفارسي المزعوم ممكن يكون مجرد تشابه صوتي أو خطأ توثيقي.


Grok شهد بخطأ Google

جروك شهد بخطأ جوجل

أدينا بنشهدهم علا بعض

2025 /6 /2

1749 قال شامي قال



لا الدرة الشامي، لها أي علاقة بالشام

ولا حتا العيش الشامي

ولا البرسيم الحجازي، له علاقة بالحجاز

ولا شبرا اليمن، لها أي علاقة باليمن

ولا الحجر الهشمي، له أي علاقة بهاشم

ولا الجبنة الرومي، لها علاقة بالروم

ولا

ولا

ولا

مجرد شبه (جناس) صوتي، ونقص ف المعلومات

- الدرة الشامي، يعني الدرة الصيفي "شامو"

- البرسيم الحجازي، يعني البرسيم البري "حجز"


- شبرا اليمن، يعني شبرا الغربية "يمن"

- حجر هشمي، نوع من الحجارة المصرية

- الجبنة رومي، يعني بطعم السمك "روم"
أهو كده تفريط وتنازل مجاني، عن رموز الهوية الوطنية
عرفتو البعد عن #دراسات الهوية المصرية بعمل إيه!
سامحيننا يا ستنا وتاج راسنا
راجعين بقوة وحماس، وحقق ع العين والراس
2025 /6 /3

1750 عادي

إحنا شعب مش عادي
إحنا تاريخ وإنجاز محصلش لأي شعب
نقدر نبني ونعلي، ونعمل أحسن مستقبل
المهم شغلنا يبقى متميز، ومش عادي



كلمة عادي دي، بنعبر بيها عن الحالة الروتينية
شخص عادي، يعني زي أي حد، مش متميز بحاجة
العادي، مجرد حالة، مجرد جزء
إحنا شعب مش عادي

إحنا تاريخ وانجاز محصلش لأي شعب
نقدر نبني ونعلي، ونعمل أحسن مستقبل
المهم شغلنا يبقى متميز، ومش عادي
2025 /6 /4

الكحة 1751

الكوحه

- سلامتك يا بني، اشرب حاجة دافية


عشان الكحة

الغريبة إن معنا الكحة بالانجليزي

Cough

إنما معنا الكحة بالعربي

سعال



يعني الانجليزي عن طريق اللاتيني خد تصريفه لكلمة كحة من المصري القديم
بارضو السرياني خد تصريفه من الأصل المصري، بس نطقها: شوحة
كلمة 𐤀𐤍𐤁𐤏 أو shūḥā يعني الكحة ف النصوص السريانية.

بقول إيه ؟

- محدش "يكح" معانا

2025 /6 /4

1752 عبير



العبير، ريحة حلوة

عبير، كلمة مصري أصلي

عبير، اسم مصري أصلي

المفرد: عبرة/ عبيرة

الجمع: عبير

- طب الكلمة دي دخلت العربي إزاي؟

- الكلمة دي وآلاف غيرها دخلو الآرامي والسرياني، ومنهم للعربي والعبري

2025 /6 /5

1753 .. خوتة



مصر اللي علمت العالم الدين

من آلاف السنين بنصلي (صلوات)، ولسه

بنصلي (مسيحيين ومسلمين)!

عارفين كل أنواع وحكمة الصيام (صوم)،

قبل صيام المسيحيين والمسلمين!

احنا اللي بدعنا التكافل الاجتماعي

(زكا)!

واحنأ الي حددنا شروط الطهارة (طهور)
أول حج ف الوجود، الحج للأرض المقدسة: أيدوس!
أكثر طقوس العالم الدينية والتحيات والدعوات، متسجلة ف مصر قبل أي
مكان ثاني!

- الأخلاق بدأت هنا يامولانا (التوراة نفسها بتقول ابراهيم ويوسف وموسا
اتعلموها من مصر)!

طقوس كثير، مسيحية واسلامية، طول عمر المصريين بيعملوها، اتلونت
اتشكلت، بس هيه هيه!

ويفضل "الضمير" الحي، هو الي يميز المصريين، عن أي ملة وأي دين!
- محموق أوي ليه؟

عشان كلمتين حمضائين قالهم راجل كبير، ييفتخران "الجرب" علمونا الدين!
أصل بسلامته فاكر اننا كنا بنعبد الشمس والقمر
عشان سجلنا رموز الطبيعة الي بتسبح بحب لخالق الكون!
هيبويه ، بلا خوتة


تخيل يا مصري، إن من أقدم وصيات جدودك المصريين:
- متعملش خوتة

وعشان يأكدها قال: متعملش "خوتة" الا ف الحق!

(كتاب طلوع النهار - سورة 125 - لوحة 31 - آيات 17 و 18 و 19)

2025 / 6 / 9

1754 حوكش



الحكش والحكشة

والفلاحوكش

"حكا"، كلمة بتعبر عن معنا السحر والروعة

ومن تصاريدها "حكاو"، يعني ساحر ماهر

ده نطقها الاصطلاحي، بقيت تايه ف

تصريفها، لأن الظاهر إنها من الألفاظ اللي مهمتها انتهت!

بالصدفة لقيتها متصرفه ومتواصلة معنا، بس ف ضدياتها أو عكس معناها!

بمجرد ما نضيف أداة النفي "ش"، تبقا "حكش" و"حكشة"، يعني بشع وحش

شين النفي أساسية ف اللغة المصري بنقولها كتير:

متاكلش / متعملش / متجيش / متروحش .. نلح

الفلاحة، شطارة ومهارة، نجاح وانتصار الطبيعة

نطلع من عكس معناها كلمة: فلاحوكش!

فلاح + حوكش، اسم مضموم، زي الأفعال المضمومة أو الممزوجة، بنوصف

بيه الأشخاص والمواقف البشعة!

2025 / 6 / 11

1755 مأموصة



أمص

مأموص

أممص

الأمص، زعل كذاب

زعل فاضي

اعتراض

واحدة عاملة نفسها زعلانة

إعلان عن الزعل

(واحدة علا خاطرها)

أمص، كلمة مصري أصلي

لو حبيت تعبر عن معناها بأي لغة ثانية، هتكتب كثير!

حتا الخواجة تايه ف ترجمة معناها!

الغريبة إن الحمار لما يعترض، بيدور وشه ويرفس برجليه، نقوم نوصف اللي

بيعمله ونقول: الحمار بيأمص!

باقي بقا نكتبها اززاي؟

زي أصلها بالهمزة؟

ولا حسب التصريف بالقاف والجيم؟


اكتبها زي ما بتنطقها، سواء حسب الأصل: أمص

أو حسب التصريف بالقاف والجيم: قص / جمص

2025 / 5 / 20

1756 تاي

حرف التي الصيني
وحرف التي اللاتيني
وحتا الله النبطي العربي




كلهم من حرف التا المصري المكتوب بالهيروجليفي، سواء في الشكل القديم
(نص رغيف + فرن العيش)، أو شكله المنتشر (نص رغيف).
الخلاصة: معظم حروف الكتابة في العالم من أصل مصري
خلاصة ثانية: الحروف حاجة واللغة حاجة ثانية خالص.
خلاصة الخلاصة: اكتب بأي حروف تعجبك، كله من خيرك!

2025 / 6 / 27

1757 أبعدية

الابعديات، أراضي بعيدة عن الزمام
وبارضو بعيدة عن المحاسبة، معلهاش ضرايب!
المخصص بتاع أصل الكلمة علامة نتر، زي أراضي البرابي!



النطق الاصطلاحي: بعيت

النطق التصريفي: بعيد

يعني تصارييف بعد وبعيد وبعدين .. نلخ، كله من هنا

من مصر بدأ العلام

من مصر بدأ الكلام

من مصر بدأ الجمال

من مصر بدأ السلام


ابعد يا شيطان ابعد يا شيطان ابعد يا شطآن

2025 /7 /3

1758 ع الترعة

اترو، منها اسم مدينة "أطور"، تلاقيها مكتوبة بالقبطي "اتور"، الفزلكة العرباوي بقا كتبها "قطور"!

شوفو كده شوية من أسامي فروع الترع والمناليل:



كلمة "ترعة" على الأرجح مشتقة من "itrw-٢٣" في اللغة المصرية القديمة، حيث "itrw" تعني "نهر" أو "قناة"، و "٢٣" تعني "عظيم".
تركيبة "تر و عا" مجرد اجتهد، له أسامي صحاح، بن يار ضو بفضل اجتهد - سمي حرك.

* مجرا، من الجدر gr

* نهر، من الجدر nhr

* نيل، من الجدر nr

* رياح، من الجدر rH

* ترعة، من الجدر itrw- ca

* جنابية: من الجدر jnb + bnjt

* مروة، من الجدر mr

* قناية، من الجدر qn

* زروق، من الجدر srq

* منصل، من الجدر nsr

* متر، من الجدر mtr

* حوال، من الجدر Hr

2025 / 7 / 4


1759 طفطف

ويل "للمطففين"

طفطف

طفطفة، يعني زيادة عن المفروض

- الحاجة طفطفت، يعني زادت ووقعت



جدر الكلمة عندنا من آلاف السنين، قبل القرآن الكريم

يبقا لازم سيادتك تسأل: دا حصل امتا؟ واززاي؟

- هتلاقي الإجابة ف البوست (الفصل) القديم ده:

[#أسباب_شه_العربي_بالمصري](#)

اللغة المصرية مهمة للهوية، مهمة للتاريخ، مهمة للعلم، مهمة للحاضر والمستقبل،

حتا إنها مهمة لتفسير القرآن الكريم!

2025 / 7 / 7

1760 العائق والعائقة



أصل كلمة "عائق"، يعني اللي يمشي بمزاجه، اللي شايف نفسه، اللي كلمته من دماغه!

نقدر نقول إن العائق والعائقة والعيايق ناس نفوسهم حرة!

ده الأصل المصري:

النطق الاصطلاحي: عاعيق

النطق التصريفي: عاييق

يعني "عائق" المصري، ملهاش علاقة بكلمة "عائق" العربي، لا من قريب ولا من بعيد

حتا دي من الكلام العربي اللي المصريين مبيتكلهموش

يعني مش ممكن واحدة مصرية تحط "عائق" ف أي جملة

كلمة العائق والعيايق جت ف ككابات مصرية من أيام المماليك، واتوصف بيها الشطار والفتوات اللي ماشيين بمزاجهم، لا هوما تبع الحكومة، ولا هوما تبع الشعب!

ومنها اتصرفت كلمة "عوق"، الناس العوق، يعني الناس الشمال اللي مخالفين!

- متعوقش بقا وترجع بسرعة

- فلانة عووقت، يعني اتأخرت عن المعتاد

ياريت نخلي فكرنا حر
مش كل حاجة أصلها عربي
بالعكس، لو دوورت، هتلاقي كلامك المصري هوه الأصل
2025 / 7 / 10

1761 رواد اللغة المصري

رغم ان الاعتراف باللغة المصري والكتابة بها بدأ من بدري أوي، يعني رفاعة الطهطاوي -تخيلو!!!- وأحمد لطفي السيد وعبعزیز فهمي واسماعيل مظهر وسلامة موسا وطاها حسين ومحمد حسين هيكل، لغاية لويس عوض. انما أول واحد بدأ يكتب ويشرح قواعد الكلام المصري (العامية)، ويقول انها مختلفة عن العربي، كان الأديب الشاعر بدر نشأت (للأسف مش لاقى صورته)، وبعده ومعاه بيومي قنديل، ومعاهم عبعزیز جمال الدين، بعدهم كتب طلعت رضوان وفتحي فرج وعصام ستاتي وميلاد حنا، وغيرهم! لغاية ماظهرت قواعد أو جرامر كلامنا المصري كاملة ف كتابي: "بنتكلم مصري" 4 أجزاء، وملخص قواعد اللغة المصري (مصري وانجليزي)!



دي كلمة باللغة العربية كتبها صديقي المؤرخ عبغيز جمال الدين ف مقدمة كتابه
 "لغتنا المصرية المعاصرة":

اهداء

الى كل من ساهم في تطوير لغتنا المصرية عبر تاريخها الطويل، منذ تحت/
 هرمس، مروراً بالغنوسيين المصريين (برديات نجع حمادي) حتى ذو النون
 المصري وسناء الملك وابن سودون وابن مماتي والمقريري والقلقشندي وابن
 ياس والشيبياني والجبرتي والطهطاوي والنديم وعياد الطنطاوي وبديع خيري
 ويبرم التونسي وعبد العزيز فهمي وعبد الحميد الديب ومحمود تيمور وطاها حسين
 وسلامة موسى ومصطفى مشرفة وإبراهيم أنيس ولويس عوض وبدر نشأت
 ويومي قنديل وفؤاد حداد وصلاح جاهين وسيد حجاب وفؤاد قاعود
 والأبنودي ونجيب شهاب الدين ونجم وغيرهم كثر أحبوا مصر وشعبها ولغتها.
 وإلى الشعب المصري الذي حافظ على لغته طوال تاريخه في سياق حياته
 اليومية وابداعاته الشعرية وسيره الشعبية وأمثاله وحكاياته..."

صديقي الغالي -ربنا يديه الصحة- قال ان فيه كثير، وبفكره أنا بمرسي جميل
عزيز واحمد رامي وحسين السيد وعبوهاب محمد وفتحي قورة ومجدي نجيب
واسماعيل الحبروك، ولسة الخير ف الكتاب والشعرا المصريين، وربنا يبارك ف
عمر صديقي الشاعر الكبير [Gamal Bekheet](#)

2025 /7 /10

1762 دول



Gardiner's list codes
D46:D21-Z4:Y1
Transliteration
dr
Translation
To delimit, to demarcate

در/ دل
دور/ دول

التمييز يبدأ من اللغة

- يعني إيه ؟

يعني فيه لغة بتساعد ع التمييز

ولغة بتقاوم التمييز، وبتضيق عليه،

وتخليه ف أقل مساحة

اللغة المصري من النوع الثاني

لأنها من انتاج شعب كان ميفرقش بين الولد والبنت

وهقول مسال (مثال) واحد من أدوات التحديد

يعني إيه أدوات التحديد؟

أقصد الي بيتقال عليها بالعربي أدوات الإشارة

أدوات التحديد ف اللغة المصري ثلاثة بس:

- ده، للمفرد المذكور

- دي، للمفرد المؤنث (المؤنث)

- دول، للجمع

تقول الولاد دول، والبنات دول

وتقول الرجالة دول، والستات دول

يعني ف جمع أداة التحديد مفيش تمييز بين الولاد والبنات

كلام المصريين، كل قواعده مصري

أدوات قواعده كلها لها جدور مصري

2025 / 7 / 11

1763 هات

ءاتينا، اذكرك واذكرت ٢٨ مرة

ءاتيناهم، اذكركت ٢٢ مرة

ءاتوني، اذكركت ٤ مرات

دول تصاريف من الكلمة العربية "ءاتي/

يءتي

مع تصاريف تانية اذكرو ف القرآن

الكريم، حوالي سبعين مرة!

حد يفسر بقا ، لما إحنا عرب وبنشكلم عربي، ليه استبعدنا الكلمة دي من

كلامنا؟



Gardiner's list codes
O4:X1-A2
Transliteration
ht
Translation
Call out ?

هات

استدعا

وبنعمل ترجمة فورية مصرية، ونقول:

هات

هاته

هاتها

هاتوها

هاتلي

هاتولي

هاتولنا

هاتولهم

- هات عينيك تسرح ف دنيتهم عينيا .. هات هات
فيه شروط لدخول أي كلمة أجنبية ف كلامنا النصري:

* لازم يكون لها أصل مصري

* لازم تناسب العادات اللغوية المصرية

* لازم تكون جاية اختراع أو حاجة جديدة

فيه زي الكلمة دي كلام كتير استبعدناه تمامن من كلامنا، زي الفعل
"ذهب"، اللي دايمن بتكلم عنه

وكلامنا اللي بيتقال عليه عربي، كله ملتزم بالتلات شروط اللي فوق دول!
وف المقابل كلام كتير عربي، أصله القديم من عندنا، عشان كده لسه
موجود ف كلامنا

2025 / 7 / 12

1764 شيكل

المال السايب، ملوش صاحب

الحكاية مش سرقة اسم (الشيكل) الفلوس وبس
مبادئ الضمير عند المصري القديم، خلاصتها:

(1) العدل، (2) العلاقة المباشرة مع الخالق القادر، (3) حب الحياة، (4)
احترام الطبيعة، (5) حب الفن، (6) وجوب العمل والانتاج وتشجيع
الابداع <الإيد البطالة نجسة>، (7) قبول المنافسة بشرف والتعدد الخلاق،
🕶️ احترام المرأة لدرجة اعتبار الأسرة المصرية أمومية مش أبوية، والقيمة
السماوية لإسم الأم، نلخ!

المبادئ المصرية الأصيلة دي، واجهت اختبارات صعبة، وقت الاحتلال
البيزنطي المسيحي، ومن بعده الاحتلال العربي الاسلامي، ومعاهم الاحتلال
السلفي الحنبلي الأيوبي!
- عملت إيه؟

- لونت جلدھا واستخبت ف الصوفية!

يا كده يا خراب واستشهاد وجهاد ودم وبلاوي زرقا!

اليهود لقو المال المصري (الأفكار والآصار)، سايب، ملوش صاحب -الي
مستخبي ف الكنيسة واللي مستخبي ف الجامع- قالو احنا كئا هنا، وكل اللي هنا

ده بتاعنا، حتا اسم الفلوس المصري نسبوه لنفسهم، ماهو المسروقات محدش متعرف عليها، والجريمة متقيدة ضد مجهول!




#حراس الهوية المصرية

عشان ترجع لهويتك ولغوتك وتقويمك وأعيادك وكنوز آصارك
لازم تتعب، وتشقا، وتعرق
ناسنا الطيبين، معذورين، سنين طويلة والتعريب شغال والتهويد شغال،
التعريب بيزور اللسان، والتهويد بيزور التاريخ!
يعني الحكاية مش سهلة، ومحتاجة بالفعل: تعب وشقا وعرق
والا هيفضل المال سايب، وملوش صاحب!
تعبان، من الجدر المصري "تعب"!
شقيان، من الجدر المصري "شقا"!
عرقان، من الجدر المصري "عرق"!
تلات تعبيرات كان المصري بيستخدمها ببساطة!
مع سياسة التعريب، بقت: كفاح/ نضال/ جهاد

حلو الكلام ده، بس كلامك انتا كان عيبه ايه؟
سيبت كلامك وأهملته ليه؟
دا غير معاني الكلام اللي ممكن تولع الدنيا وتودي ف داهية!
المال السايب ملوش صاحب

2025 / 7 / 17

1765 أداة استقرار واستقرار



بنتكلم بشويش

بنتكلم بهداوة

الجملتين اللي فوق دول معناهم واحد
لأن بشويش من المصري القديم = بساطة/
هداوة

الفعل (بنتكلم) فيه أداة الاستقرار، وكان

الصفة (بشويش) فيها أداة الاستقرار

بس إحنا هنتكلم عن حاجتين:

١- عن أداة مصرية قديمة، لسة معنا

موجودة ف كلامنا من آلاف السنين

هيه أداة دوام واستقرار الملكية

يعني مش استقرار وبس، استقرار وملكية

- استمرار واستقرار

وكانك بتحوط ع الكلمة بايديك وبتقول: بتاعتي
بتكلم عن البه (ب) بداية أفعال وصفات كثير
- أفعال الاستمرار لازم تبدأ بحرف البه

باكل/ بشرب/ بلعب .. نلخ
- صفات الاستمرار لازم تبدأ بحرف البه
براحتك/ بكيفك/ بأدبك

(عاوز تقعد معانا، تقعد بس بأدبك)
حرف البه، أصله من أداة الإستمتر والملكية بن pn
والنون بتتاكل، أو يحصل إهمال لحرف النون
ونشوف تطبيق للكلام ده ف الصورة
يعني القاعدة قديمة ومتطبقة من آلاف السنين ، ولسه ف
كلامنا الحالي#اللغة_المصري

رغم إنها بحالتها البكر (بن) موجودة بارضو عند الاسكندرانية (بنخبوه)،
وشوية صعايدة ماصلين (بناكلو)
يعني النون الاسكندراني هنا مش للجماعة، دي نون أصلية ف أداة ملكية
واستمرار، لسة مستمرة معانا!

٢- تتكلم بقا عن الصورة

وبالتحديد نتكلم عن دروس التصريف الي ف الصورة

الصراحة جدودنا كأنهم باعيتنلنا جوابات يطمنوننا اننا بنقرا كلامهم صح
حسب طريقة:

#النطق التصريفي-الحركي

النطق الاصطلاحي: بن -ايونت

*النطق التصريفي: باؤنة

النطق الاصطلاحي: بن-ابت

*النطق التصريفي: بابه

النطق الاصطلاحي: بن-خنس

*النطق التصريفي: بشنس

كأننا بنقول أسامي الشهور صح من آلاف السنين

كل الحكاية إن مولانا الاصطلاحي يعمل نفسه مش شايف قواعد علم
الصرف!

* نون أداة استمرار واستقرار الملكية (بن) اتاكت


* النون بتتشقلب مع الميم: برنودة/ برمودة

* حرف الته الهيروجليني يتنطق ته مربوطة ف الآخر عادي

* حرف الخه بيتتشقلب مع الشين: بخنس/ بشنس

2025 /7 /18

1766 واه، أداة استعجاب



واه يا بوي

جملة مصرية، فيها ثلاث أدوات مصري

* واه، أداة عجب

* يا، أداة ندا

* وي، ضمير للفرد

* اب، إسم الأب

يعني جملة كاملة مصري ١٠٠٪

عندنا ضمير الفرد/ الأنا، بالألف وبالواو

حالات ف أول الكلام، وحالات ف أخره

بالألف ف الآخر: أبا / أما = أبويا أنا/ أهي أنا

بالألف ف الأول: آكل / أشرب = أنا باكل / أنا بشرب

بالواو ف الأول: واكل / واخذ

بالواو ف الآخر: نكسرو/ نشربو

يعني مش كل الواوات جمع

صحيح عندنا واو الجماعة (من غير ألف)

إنما كان عندنا واو الفرد/ الأنا

شوفو تحليل كلمة "بنجوه" الاسكندراني:

بن (أداة استمرار وملكية) + حب + واو الأنا + هه (ضمير)

يعني لو عاوز تترجم كلمة "بنخبوه" الاسكندراني
للعربي، هتلاقىها = أنا مستمر في حبه
للانجليزي i still love him =
المصري له أدوات ، والعربي له أدوات
حتا لو شبه بعض
المصري حاجة، والعربي حاجة ثانية
قواعد العربي حاجة، وقواعد المصري حاجة
الكتابة العربي حاجة، والكتابة المصري حاجة
حتا لو بنكتب بحروف نبطي عربي، تفضل القواعد مصري
بالمناسبة، الحروف النبطي أصلها مصري
محدث خد باله إن الواو النبطي العربي أصلها من المصري؟
2025 /7 /22

1767 مشعت

- عمر ك سمعت فلاح بيقول: الأرض "مشعّة"؟
- إيوة، سمعت!
- طب معناها إيه ؟
- يعني فيها حشايش نجيلة وسعد ودنيبة وحامول .. نلخ!
يبقا الأرض فيها نباتات غريبة بتأذي المحصول، ومحتاجة مقاومة!

- مقاومة؟

- أيوة مقاومة، زي مقاومة الأمراض!

يا خبر ما هو ده معنا الكلمة من جذرها المصري القديم

النطق الاصطلاحي: مشت

النطق التصريفي: مشعت

بالمناسبة النطق التصريفي هنا عبارة عن

تصحيح لنطق القاموس الاصطلاحي ،

لأنه أهمل حرف العين اللي واضحة زي

الشمس!

طب دي كلمة مبنستخدامش دلوقتي كتير، يعني ف نطاق محدود للفلاحين

بس!

أيوة ناسنا الفلاحين ف الغيطان، والحرفيين والشعبيين ف الحارات، دول

[#حراس_الهوية_المصرية](#)

كل كلمة من كلامنا المصري، كنز من كنوزنا

محتاجين نحافظ عليها وندرسها (أقسام ف الجامعة)

عشان الحاجات دي هيه اللي بتشكل الهوية الوطنية

2025 / 7 / 24




1768 متل امبارح

مادام بتكتب بالمصري
جمحد قلبك، عبر عن نفسك، متلتزمش الا بقواعد المصري
لما تكون بتكتب عربي، التزم بقواعد العربي
ولما تكون بتكتب انجليزي، التزم بقواعد الانجليزي
بارضو، لما تكون بتكتب كلام مصري، التزم -بس- بقواعد الكلام المصري
- واكتب زي ما بتنطأ (أد ماتقدر)

هوه، مش هو
هيه، مش هي
انتا، مش أنت
انتي، مش انت
هو، مش هم
لاكن، مش لكن
معا، مش مع
شوكرن، جدن، تمامن
لأن النون هنا مش تنوين عربي
دي توكيد مصري، يبقا لازم تنكتب
اكتب:


هودا/ مونا بدل هدى/ منى

حتا/ بقا. بدل. حتى/ بقى
 معندناش حاجة اسمها ألف مقدرة، دي تخص العربي متخصناش
 اكتب واو الجماعة من غير ألف
 لأن اللي ميتنطقش مينكتبش



ف الصورة جدر من جدور كلمة (متر/ مسل) وجمعها أمسال، يعني شواهد
 كتير ونماذج كتير!
 النطق الاصطلاحي: متر
 النطق التصريفي: متر/ مسل
 شايفين المخصص أو الرمز بشكل حرف اللام، اللي أخذها الأنباط مننا،
 وبعدين بقا يتقال عليها حروف عربي!
 2025 / 7 / 26

1769 بريد



سواح بين البلاد ينقل الجوابات
مخصص المشي والحركة واضح
يعني الكلمة ملهاش علاقة لا بالبعلة ولا ديلها
سواح بين الأرياف
طبيعي إن اول دولة، واول مؤسسات، يكون عندها وسيلة لنقل الجوابات بين
البلاد
واحد يسافر ويتنقل بين البلاد
وكمان مع الحمام الزاجل، كان عندنا الوز اللي ينقل الرسائل
كانو يعلقو الرسالة ف رقبة الوز
النطق الاصطلاحي: بريت
النطق التصريفي: بريد
قبل ما تشوف أصل الكلمة ف العربي أو الفارسي، شوفها عندك الأول!
مصر هيه الأصل
2025 / 7 / 27

1770 هأو أو أو

	
Gardiner's list codes M16-G1-Z7-Y1	
Transliteration h3w	حأو
Translation Increase	هأو

تعبير مصري أصلي

معارضة؟ استخفاف؟ استعجاب؟

- كل ده مع بعضه

معناها الحرفي = دا كتير أوي/ بزيادة بقا

النطق الاصطلاحي: حأو

النطق التصريفي: هأو

- تفتكرو حد غيرنا بيستخدمها؟

أهي دي من التعبيرات المخصوصة بتاعت المصريين

يعني فيه حاجات صعب يقلدونا فيها

اززاي؟

اززيك؟

كويس؟

بقا


بتاع

أوي

لسه

2025 /7 /29

1771 شريط (مشرط)

sherà-t شریط		obstruction, bar.
sher-t شرط		○, Rec. 31, 13, obstacle.
sher-t شرطة		, bond, tie, fetter.

شرط (شروط / اشتراطات)

شریطة (لربط الشعر)

الجدر المصري "شرط" بتصاريف ومعاني كثير!

1. شريط أرض (فاصل أو حاجز بين أرضين)

شریط شاش

شریط قماش

شرط وتشريط ومشارط

2. شرط، وشروط ومشارطات (التزامات)

3. شريطة قماش، رباط لشعر رأس البنات والستات

كل ده، وغيره، من كلامنا المصري (المتداول / الحالي)، بس جدوره مصري

قديم، من آلاف آلاف السنين!

• كلامنا المصري:

(نحو+صرف+صوتيات+عادات لغوية+ألفاظ)

• نحو مصري خالص 97%

- صرف مصري خالص 97%
 - صوتيات مصري خالصة 97%
 - عادات لغوية مصرية 97%
 - وبارضو الكلام (الألفاظ) نفسه أكثره مصري 90%
 - اللي لسة فاكرين انهم بيتكلمو عربي، ضحايا سياسة التعريب المتعلمين المصريين بيعرفو عربي، لأنه اللغة الرسمية والدينية، انما كلنا
- 2025 / 7 / 30

1772 م "نعول" أبو اللي بيكره مصر!

- مش ملاحظين الشتيمة المشهورة: "منعول أبو فلان"؟
- كلنا فاكرين إنها -لخفنة- من كلمة "لعن"!
- الحقيقة إن الأصل "نعل"، و"لعن" مجرد تصريف بالخفنة!
- طب الحكاية أصلها إيه؟
 - أصلها إن كان ف مصر القديمة يومين أو ليلتين:
 - يوم لـ "النعل" ويوم لـ "النعي"!
 - المناسبتين عكس بعض!
 - "النعل" شتيمة، و"النعي" شكر!
 - نشكر يوم، ونشتم يوم!
 - فيه ناس تستاهل الشتيمة، زي مافيه ناس تستاهل الشكر!

- نشتم الي يستاهل الشتيمة، ونشكر الي يستاهل الشكر!
- يوم (22) من كل شهر مصري، سهرة (ليلة) للشكر "نعى"!
- يوم (23) من كل شهر مصري، سهرة (ليلة) للشتيمة "نعل"!
- الترجمة من عالم المصريين الألماني "شوت سيغفريد"!
- ولأن الميت ميجوزشي عليه غير الرحمة، بنعملله: "نعى"!
- ولأن الوحش، لازم يتعرف، بـ "ننعل الي جابوه"!



النهاردة (23) من شهر أييب (أبو اللهايب)، بقتراح كلنا:

- ننعل كل الي بيكره مصر
- ننعل كل الي يعادي الهوية المصرية
- ننعل كل الي يتريأع اللغة المصرية

2025 / 7 / 31

ق 1773

أقحاح

الكلمة وتصارينها شبههم عربي خالص
إغما تدور عليها ف القرآن مش هتلاقيا

وأقدم حاجة مكتوب فيها كلمة "قح"، من ديوان الانشا المصري الفاطمي، وبالتحديد ف رسائل الرئيس فهد كاتب الحاكم.

يعني الكلمة دي طلعت من مصر ورجعتها تاني بشكل عربي!

طيب نشوف أصلها من المصري القديم = واضح/ ساطع

جميل بس استخداما الحالي، بمعنا صافي أو خالص

يعني زي ما بنقول: فلاح أراري،

بنقول بدوي قح

نفس المعنا

طب ماهو الشئ الصافي الخالص،

لازم يكون ساطع وواضح

أو إن المعنا اتطور

المهم إن كلمة "قح" من أصل مصري

قديم ، وإنها مش موجودة ف القرآن!

خلاصة رقم ١:

مش كل كلام المعاجم العربي صح

خلاصة رقم ٢:

كلامنا الحالي لازم ندعمه بجذوره من المصري القديم


2025 / 8 / 5

	
Gardiner's list codes	
N29-G1-M16-G1-N8	
Transliteration	
kh	
Translation	
Light	
Grammar type	
Noun	
Translation	
Glow, light, bright	

سامي حرك

قح

1774 زهرة

^{زهرة}
Sehrát | , Ombos I, 46, a
moon-goddess.



زهور

زاهر

زاهرة

أزهار

زهيري

كمان منها:

سهر/ ساهر/ سهران/ سهرة

ظهر/ ظاهر/ ظهور/ ظواهي

- إظواهر إن الموضوع كده بقا!

كل الكلام المصري، أصله أسامي!

- يعني إيه؟

- يعني الاسم - ف مصر- هو بداية كل فعل وكل صفة!

زهرة، ربة القمر


عشان كده بنوصف البنت الحلوة، بالقمر

- وبنات قمرات زي الشرابات

ظهور القمر كناية لكل ظهور

2025 / 8 / 6

1775 تنك



Gardiner's list codes
D46:N35-M17-X1-F21:X1-Z1

Transliteration
dní

Translation
To share, to block up, to stay aloof from, to keep oneself from

تنك ماشي

دنك قاعد

دنك نايم

نسمعها من فوزي، ف مال القمر ماله:

ل اتني أقول اه، آه ، آه ، آهي

تني أو دني

من كلام المصريين الخصوصي

بمعنا = تفضل

لا تقولي عربي ولا عبري

دي حاجات بيقولها المصريين من آلاف السنين

النطق الاصطلاحي: دني

1776 أشمون

أشمونين

التصريف حسب قواعد المصري، سهل وبسيط أوي

الكلمة اللي ف الصورة دي "نخن"، يعني ثمانية

وكمان رمز لحاجة اسمها بالعربي: ثامون

مدرسة دينية فلسفية، منسوبة ل تحوت

بتتكون من أربععجواز:

نو/ نونت

ح/ حاحت

كاك/ كاكث

امن/ أمنت


الأربععجواز دول، ذكر ونتاجية

تقريين كل المدارس الدينية

والفلسفية المصرية القديمة، قائمة ع

الراجل والست

يعني التقديس هنا للاتين



وساعات الست يكون لها مكانة كبيرة، زي است (ايزيس)، اللي موجودة
ف كل المدارس الدينية، عنصر مشترك للكل، حتا ف عصر المهرطق
اخناتون، كانت ايزيس لها مكانة ممتازة
خلينا ف اللغة

يهمني هنا التصريف اللي شكل كلمة: نحن، يعني تمانية
- هنلاقي ائله اتصرفت مع الشين، زي أشمون وأشمونين
ونلاحظ إن الألف دي أداة تعريف، لازم نجرها ف التصريف!
- كمان ائله اتصرفت مع الثاء العربي، اللي المصريين ينطقوها سين، بقت:
سمانية

- وبارضو اتصرفت مع الته، ف نطقها الحالي: تمانية
الخلاصة: ائله بتبديل بالتصريف، مع الشين والسين والته
رغم انهم مش من مخرج صوتي واحد
وده ميمنعش شقلبة ائله مع حروف مخرجها الغين والكاف

2025 /8 /9

1777 لسه

لسه جاي؟

لسه فاكرو؟

لسه الحب صافي، ولسه الجو دافي، ولسه فيه قمر



Gardiner's list codes
D21-Aa18
Transliteration
r s3
Translation
Behind, after

لسا / لساو / لسه

59. أدوات كالة:
"كان / لسه": هنغني كان وكان / كان شويه / لسه جاي
دلوقتي / لسه فاكرو؟ كان زمان.
60. أدوات تأكيد:
"أومال / تمام / حاضر / أكيد / مؤكد / أوي"
أومال طبعن / احنا جامدين أوي.
61. نون التوكيد (التأكيد):
"شوكن / تمامن / فعلن / جدن / فورن / بتاتن"
كتابة نون التوكيد ضروري في اللغة المصري، لأنها قاعدة،
مش مجرد علامة زي العربي!

من كلامنا الخصوصي (اللغة المصري): لسه

دي بدايل "لسه"، ف كلام جيراننا:

عقب (كويتي)، بعد (يميني)، بعده (قطري)، للحينه (بحريني)، باقي
(مغربي)، هلق / هالأ (سوري)، بعدو (لبناني)، هسه (عراقي) .. نلخ.

النطق الاصطلاحي: رسا

النطق التصريفي: لسا

الألف حرف حركة، ف حالة المد يطلع معاه صوت الهه

عشان كده مبنقفش عند: لسا، وبتطلع: لسا/ لسه

- النطق الاصطلاحي ، مهم، بس لازم نعرف إنه:

#النطق_الاصطناعي_الاصطلاحي

- إنما النطق التصريفي ، أهم، لأنه:

#النطق_الطبيعي_التصريفي

ياريت نعرف ونعرف ولادنا قواعد كلامنا

هيزيد تصالحهم مع كلامهم، وتزيد صقتهم (ثقتهم) بنفسهم

2025 / 8 / 10

1778 نجا

	 Gardiner's list codes N35:Aa27 Transliteration ng نجا Translation Save, protect
---	--

نجاة

ناجي

نجية

نجاتي

منجي

منجية

الجدر المصري "نجا"

بعلامة قارب الانقاذ

بمعنا الحماية والانقاذ

اتصرف منه كلام كثير ف كلامنا وكلام غيرنا

الكلمة وتصاريدها لسه معانا، ومتسجلة عندنا من آلاف السنين

لو انها موجودة ف العربي أو العبري أو الآرامي فالسبب مشروح ف بوست

[#أسباب شبه العربي بالمصري](#)

ولو عندنا وعي بالتاريخ المصري القديم، هنعرف ان مصر كانت أهم دولة ف

العالم القديم لآلاف السنين، ولغتها اتسربت لكل اللغات

محدث يدحك عليك ويقولك أصل اللغات السامية والحامية والمش عارف

إيه، دي كلها منظومة تزوير!

بلا نظريات بلا اسرائيليات

آدي الجمل وآدي الجمال

الكلمة ومعناها موجودين ف الصورة

الي عنده مستند أقدم يقدمه، وزى الشهر العقاري: "العبرة بالتسجيل الأقدم!"

2025 / 8 / 10

1779 سيدنا موسا عنديكو؟

- لآ، معدنناش

طب، سيدنا يوسف عنديكو؟

- لآ، معدنناش

طب سي لفندي فرعون عنديكو؟

- ولا دا كان، ومسمعنناش عنه غير منكو؟

ليه بس كده؟

- يا حبيبي الاصار (الآثار) المصرية والتاريخ المصري لغاية الأسرة ثلاثين

مفيومش أي حاجة عن الجماعة دول، ولا كل القصص اللي التحكت عنهم

أومال الكتب المقدسة بتكذب يعني؟

- لا العفو، بس انتو بتدورو ف حثة غلط

طب الحثة الصح فين؟

ΑΙΓΥΠΤΙΑΚΑ ΤΟΜΟΣ ΠΡΩΤΟΣ

FR. 1. EUSEBIUS, *Chronica* I. (Armenian Version),
p. 93 (Ma).

Ex Aegyptiacis Manethonis monumentis, qui in
tres libros historiam suam tribuit, — de diis et de
herubus, de manibus et de mortalibus regibus qui
Aegypto praefuerunt usque ad regem Persarum
Darium.

1. Primus homo (deus) Aegyptiis Vulcanus¹ est,
qui etiam ignis reperiatur apud eos celebratur. Ex
eo Sol; [postea Soais²]; deinde Saturnus; tum

¹ Cf. Joannes Lydus, *De Mensibus*, iv. 86 (Wünsch).
On Manes, after speaking of Hephaestus, Lydus adds:
καὶ δὲ τοῖς αἰσθητοῖς ἀποφαντικῶς ἀναγράφεται ἐν τῷ
πρῶτῳ βιβλίῳ, ἐν ᾧ ὁ πρῶτος ἀρχηγὸς καὶ ἡγεμὼν
ἡγεμονία ἐστὶν ἀπὸ τοῦ πρώτου ἀρχαίου τοῦ πρώτου, ὃς δὲ ἡθερ,
ὃς ἡθερ, καὶ δὲ ὄψης, ἡθερ τῶν τοῦ, ἀπὸ τοῦ ὄψης.
From this passage we see that Lydus gives the sequence
"Hephaestus, Helios (the Sun), Cronos, Osiris, Typhon,"
omitting Soais as Daubina does. After this passage in
Lydus comes Fr. 84 *Terios* 34 . . .

² From Joannes Antiochenus (Malalas), *Chron.*, 24 (Migne,
Patrologia, Vol. 97).

³ Bracketed by Hodyner, *Fontes Historiae Religiosae*,
Bonn, 1922-3, p. 65.

2

THE AEGYPTIACA OF MANETHO: MANETHO'S HISTORY OF EGYPT

BOOK I.

FR. 1 (from the Armenian Version of Eusebius,
Chronica). DYNASTIES OF GODS, DEMIGODS,
AND SPIRITS OF THE DEAD.

From the Egyptian *History* of Manetho, who com-
posed his account in three books. These deal with
the Gods, the Demigods, the Spirits of the Dead,
and the mortal kings who ruled Egypt down to
Darius, king of the Persians.

1. The first man (or god) in Egypt is Hephaestus,¹
who is also renowned among the Egyptians as the
discoverer of fire. His son, Helios (the Sun), was
succeeded by Soais: then follow, in turn, Cronos,

¹ The Pre-dynastic Period begins with a group of gods,
"consisting of the Great Ennead of Heliopolis in the
form in which it was worshipped at Memphis" (T. E.
Peet, *Cambridge Ancient History*, i, p. 250). After summar-
izing §§ 1-3 Peet adds: "From the historical point of
view there is little to be made of this". See Meyer,
Geschichte des Altertums, I, ii, p. 102 f. for the Egyptian
traditions of the Pre-dynastic Period. In the Turin
Papyrus the Gods are given in the same order: (Ptah),
Ra, (Shu), Geb, Osiris, Seth (200 years), Horus (200 years),
Thoth (3126 years). Ma'at, Har, . . . Total . . . See
Meyer, *Ass. Chron.* p. 116, and cf. Fr. 2.

3

- هتلاقوهم ف تاريخ الهكسوس، ودول جماعة دخلو مصر ضيوف لاجئين حوالي مية وخمسين سنة، وبعدين احتلو مصر كان مية وخمسين سنة، ودول كانو أربعين عشيرة، منهم العبر والسبأ والعرب، ومعظم الحواديت والشخصيات اللي حكاها العبرانيين والعرب حصلت ف الفترة دي

- طب، يعني حصلت ف مصر وقت الهكسوس ، أومال المصريين مسجلوهاش ليه؟

- المصريين ناس ايجابيين، مبيسجلوش لا الهزائم ولا السليبات، شعب متعود ع الانتصارات، أما الاحتلالات والهزائم دي، ولا كأنها حصلت

طب الهكسوس نفسهم مسجلوهاش ليه؟

- لأنهم عشائر بدوية ، والمباني والرسم والنحت والكتابة كانت علوم متقدمة ملهمش فيها

طب سيادتك عرفت إن الحواديت والشخصيات دي موجودة ف الفترة الهكسوسية ازراي؟

- عرفتها من حاجتين:

أول حاجة: كتابات نحوي مصري اسمه ابيون، والرد عليها من أقدم مؤرخ يهودي اسمه فلافيوس يوسيفيوس

وفيه كتاب نقل مؤلفات أبيون اسمه ايجيبتيكا

تاني حاجة: أعمال ف تحليل أسامي ملوك الهكسوس، طلعت منها أسامي كتير عبري وعربي، زي عنتره ويعقوب وشارك وباراك وغيرهم بالإضافة لآسامي حوالي سبعة وتلاتين عشيرة من الأربعين الهكسوسية

طب، معلّش بقا أنا ولا كأني سمعت حاجة

- متوقع يا خويا، بالسلامة

2025 / 8 / 11

فل 1780



Gardiner's list codes
O1:D21:D21-D54
Transliteration
prí / prr
Translation
To go forth, to emerge, to escape, to issue, to leave, to proceed

فلول

فلسع

فله

الجدر المصري "فل"، بمعنا = هرب / زاغ

مكتوبة بحرف متكرر، للتضعيف أو التشديد

ده مسال (مثال) للضغط بتكرار الحرف

صحيح الكلمة بقت نادرة

إنما منها تصريفة فلول

فلول المنسحبين

فلول الهربانين

كمان عملت فعل مضموم / ملزوق

فل + لسع = فلسع

ومنها ال فله اللي بنقفل بيها الأزايز، بتمنع تسريب السوائل

مش لازم أكرر بقا إن الي الثقيلة كتير أوي نطقها أقرب للفه،

والره واللام كأنهم حرف واحد

النطق الاصطلاحي: prr


النطق التصريفي: fl

2025 / 8 / 17

1781 تجريد الارهابي المجنون

الخليفة المأمون

حتا المؤرخين المسلمين، وصفوه بالتهب والشذوذ



- خرب ونهب الهرم، وكان ناوي يهده

وحكومتنا كافتته، عملت أكبر شوارع مصر الجديدة بإسمه

- قتل ثوار البشمو وخطف ميت ألف ولد وبنت

ومن تاني بيتخلد ف نفس مكان جرائمه

شارع الخليفة المأمون، كفر الشيخ
دي بيسموها مازوخية وطنية
كده يبقا فيه شوارع بتتجهز لإسم جولدا والنتن!
2025 / 8 / 24

1782 ملك الحواديت

أكثر حواديت العالم، بدأت من هنا، من عندنا
مش بس كده، دا كان عندنا مهرجان كامل للحواديت
حواديت الشمس رع
حواديت الفنان بتاح
حواديت بقرة السما
حواديت خلق السنة
حواديت رجوع الغاية (عودة الغائبة)
حواديت أول نفراني، غنوم
حواديت أول فيلسوف (فيلسوف)، تحوت
حواديت أول كوميديان، بس .. ملك الحواديت
حواديت ورسايل المهاجر، سنوحي
نسبة كبيرة من حواديتنا وحواديت العالم ظهرت ف مهرجان الحواديت
السنوي، وجوايز لأحسن حدودة!

- الشاطر حسن وست الحسن والجمال وأمنا الغولة (حورس وهاتور وسخمت)
- لايون كنج/ الأسد الملك، من قصة أوزوريس وحورس وعدوهم سوت!
- رادوبي أصل سندريلا
- ايزيس والعقارب السبعة أصل الأميرة والأقزام السبعة
- البحار التايه أصل سندباد
- الطفل اللقيط "أودوم" .. !
- الأسد والفار، القط والفار، التعلب والوز .. نخ
- ملك الحواديت
- أكثر حواديت العالم، بدأت من هنا، من عندنا
- مش بس كده، دا كان عندنا مهرجان كامل للحواديت
- حواديت الشمس رع
- حواديت الفنان بتاح
- حواديت بقرة السما
- حواديت خلق السنة
- حواديت رجوع الغاية (عودة الغائبة)
- حواديت أول نخراني، غنوم
- حواديت أول فيلسوف (فيلسوف)، تحوت
- حواديت أول كوميديان، بس .. ملك الحواديت
- حواديت ورسايل المهاجر، سنوحي

نسبة كبيرة من حواديتنا وحواديت العالم ظهرت ف مهرجان الحواديت السنوي، وجوايز لأحسن حدودة!

- الشاطر حسن وست الحسن والجمال وأمنا الغولة (حورس وهاتور وسخمت)

- لايون كنج/ الأسد الملك، من قصة أوزوريس وحورس وعدوهم سوت!

- رادوبي أصل سندريلا


- ايزيس والعقارب السبعة أصل الأميرة والأقزام السبعة

- البحار التايه أصل سندباد

- الطفل اللقيط "أودوم" .. !

الأسد والفار، القط والفار، التعلب والوز .. نخ

مهرجان الحواديت، من قائمة اعياد مصر القديمة ، العيد رقم 68، ف الملحق الخامس، من ملاحق كتاب الأعياد الطبعة الثانية



مهرجان الحواديت، من قائمة اعياد مصر القديمة ، العيد رقم 68، ف الملحق الخامس، من ملاحق كتاب الأعياد الطبعة الثانية

2025 / 8 / 25

1783 الفلاح الفصيح

حدوتة "غنام", الفلاح الفصيح

بهاء جاهين - الأهرام

مراجعة وإضافة بتصرف: سامي حرك

- الشكوي الخامسة

ياسيدي يامتولي ع المية

صياد سمك قرموط وبلطية

أنا ع الشطوط صياد فقير عدمان

سيب البساريا ياعزيز ليا

أنا زي ما انت حضرتك راسي

فلاح، وبتراب الغيطان مرزوق

مالي اللي حيلتي هو أنفاسي

لو اتسرق مني أموت مخنوق

ياسيدي يامتولي ع المساكين

وعينوك قاضي عشان ترحم

وتحنّ وتقول حق مين علي مين

ما تقول لسارق الفقير اتلمّ

شوف رحت فين وقول يا عين انظري

تلقاك نصفت الظالم المفترى
أنا كنت عشان فيك ولكن لأ
بدال ما جبت الحق جيت ع الحق
وقُتَّ سدّ فوش مين جالك
ياما سد قام واتهد خد بالك
ياسد حايش حقي شوف بعينيك
ماية وجاية بسرعة منك عليك

- الشكوي السادسة

ياسيدي يامتولي بيت الحق
افتح لي باب بيتك، يادوبك شق
وعليّ صوتك، قول يعيش الصدق
الخير يعيش والشر منه يطقّ
زي الشبع من بعد جوع العدل
كما توب دفا ما يخلي ولا عريان
زي الصفا بعد العواصف هلّ
وكل مين بدنه ارتعش دفيان
وزي فرن الدار يحلّي الأكل
أو سلسبيل النيل، وانا عطشان!
فتح عينيك، صحصح، وشوف الناس

دا اللي في إيده قسمة الميراث
مال اليتيم والأرملة نهبه
واللي حضر للصالح قاده نار
وبدال ما يهدا السر طار لهبه
واللي أخذ بالغصب قوت الناس
هجم بفجره ع الميزان قلبه
لكن إذا انعدل الميزان ما انزق
الكفة لما تميل تميل للحق.

- الشكوي السابعة

رَسِينِي يا اللي انت دفعة كل مركب نيل
كل المراكب خشب، ما تجري غير بهواك
يا اللي انت في الحكمة توت*، أبو الميزان ما يميل
طَوِّل لي بالك، دا انا مسكين قصدت حِمَاك
أمانة ما تتضايقتشي مني ولا تزهدق
دا حتي مش من مقامك الزهق، فبلاش
بلاش تبص بعيد لا من البعيد تقلق
ماتنشغلش بحاجات لسه أوانها ماجاش
واوعي تفرح بشيء لسا في علم الغيب
الصبر طيب جميل يوصل عروق المحبة

والصبر يبقى غلط لوع الغلط والعيب
وصاحبه لم حد عالم إيه في قلبه استخبي
لما القانون ينهدم، لما المسلة تميل
لو حد حاله عَدَم زبي يعيش ازاي؟
حقه يضيع، تتنهب جلايَّته الهلاهيل
ويجضّ ويلالي ولا تسمع له قولة آي
ملا الكلام جتتي والقلب جوه أن
طلع الكلام غصب عني ماخدش مني إذن
والسد لما انتقب، الماية قالت آه
وشفايفي فتحت لقلبي يحكي علا بلواه
وضربت بالمقاديف ف النهر اشوف له قرار
وزححت منه اللي فاض من همّ بالقنطار
وغسلت فيه خلقتي م العفار والحزن
آدي الكلام انخرس والمعني قدامك
إيه اللي فاضل عشان تنظر لخدماك
كسلان تغيتني ياقاضي والكسل دا يعلّ
أما الطمع ما انجمع يضحك عليك فيقلّ
ومن الجشع ياجدع تكتر عداك وتزيد
بذمتك شفت يوم فلاح تلم زبي
يصبر علي وقفتي ع الباب باقول وباعيد

والوقفة علي باب جِبلَة تَعْلَ وتَعِيّ؟!
لا مَخْلِي ساكت يقول ولا اللي نايم يقوم
ولا اللي هده الشقا من هدته يرتاح
واللي لسانه انعقد عقدة لسانه تدوم
مع قاضي لا يحلّ ولا يربط، ولا بينزاح!
القاضي يحكم يقول ابعده ياظلم بعيد
خدام لنا مسئول عن فرحنا يزيده
صناعي أسطي يهندس كل شيء موجود
وان راس قتيل انقطع يوصله بإيده.

- الشكوي الثامنة

بيت التناش ما بيعلاش
وابوعين فارغة مايشبعش
كل فلاحته فشل وفاشوش
مهما بيكبش ماييكسبش
وانت بتغرّف ولا تلقاش
مهما بتعزق مابتفلحش
اسمح لي أقف واطلب حقي
واضح حقي وضوح الشمس
بيتك بالخيرات عمران

بطنك مليانة وسكران
 قدح البيرة ف شنبك زَبْدَه
 وقدح قمحك فاض عن حده
 واتبعتر منه فدان
 قدح اتهز انتطور نصه
 ضاعت منه ياما سنابل
 والفلاح اهه مرمي ف خُصّه
 ما انت حرامي ولص وقاتل
 والقاضي مقامه يكون عادل
 جبل الظلم يمدّ يِقْصُه
 واللي اتبنا بالظلم يهده
 أنا مش جيّ بشكوتي خايف
 باللي ف قلبي ماحدش عارف
 أنا راجل علا قد الحال
 أنا علا بابك رايح جيّ
 ومانيش هايب يامولاي
 حضرة قاضي ف هالة ضي
 إكمنّ انا ولا نخر ماليش
 في الرافعين شكوايهم زي
 عندك أرض وعندك طين

وفلوس ياما من الملك
عندك غلة وزاد وخزين
وجعان برضه؟! يا عيب الشوم
هو انت لا مؤاخذه ضلالي
الناس تبعك ينهبوا مالي
والشبعان يسرق مسكين؟!
واللا انت لا مؤاخذه موالس
ومقاسم في السرقة وجالس
في الكرسي تقسم فدادين؟
حبة عدل يا قاضي العدل
ماعت* لا تميل ولا تختل
دا انت قلم توت، ورق البردي
والمحبرة، إكتب بما يرضي
ربنا توت، قلبك لم زل
دا مفيش أحسن من خير قادر
يحكم علي ماعت ما تغادر
وتعيش بيننا ف حضن العادل
وف موته ف مقبرته نُحَلِّ
دا اللي يقيم العدل، صحيح
بيوت ويحنطوا مومياه

لكن اسمه يفضل بيننا
منا، ولا يمكن ننساه.
هو العدل كده، خلاه
من كراماته ميزان ما يخيش
يوفي الكيل بما يرضي الله!
وسطن إيدك، ماتطيش!
وسواء أنا أو واحد تاني
جالك يحكي اسمع شكواه
مش تبقي مصدر له الطرشا
وترد عليه زي الخرس!
دا المظلوم يا جناب القاضي!!
تظلم ليه إنسان ما ظلمش؟
قلبك فاضي يا قاضي الظلم
لا بترق ولا بتهتم
وانبج حسي ولا بتحس
وكإني مش واد قوال
وكلامي طالع من فم
رع ذات نفسه إله الشمس!
ماعت تعمل خيرها تنول
ماعت معني يعيش علا طول

وقانونها مفيش منه اكمنه
دايماً ماشي بالمعدول
كون ماعت ح تكون من ساعة
ماح تعدل فوق راس الكل
هو ميزان الحق يميل؟
لو يميل العيب في الكفة
اللي قصد كفتنا تشيل
لو زاد المتقال وما كفي
فيه لعب أكيد في المتاقيل
في شوية فول، هم يعدي
في هموم الناس هم تقيل
شغل مدينة ف داهية يودي
وانا طبعا ع الريف تراحيل.

- الشكوي التاسعة

يا اخواننا دا لسان النفر منا
لسان ميزان
بيان كلامه ان كان كلام موزون
واللا الي قاله عنده دقة نص
احكم ياقاضي. وكون شديد اللص

الناس تهابك والشرف ينصان
دا الكذب لو رعرع وطَرَحُهُ بان
إِسْوَد، وما يطرحش غير خروب
يعيش يومينه، وهي ساعة زمان
وتيجي ماعت تعدل المقلوب
ماعت علي إيديها القضا مكتوب
ع الكذب، حاكم الكذب
عاجز مالوش رجلين
غير بس للتوهان
ومالوش معدية
يوصل لبر أمان
والي تزهره له الحياة بالكذب
لا تكون له خلفة تفرحه
ولا يسيب من بعده ذرية
لا تكون تقيل ع القلب
ولا خفيف لعي
لا مندفع مطيور
ولا بطيء لكعي
لا تميل لحد
ولا لى جيّ علا هواك تبقي عبد

لا تداري وشك م اللي تعرفهم

ولا تعما عنهم وانت شايفهم

وان جاك فقير قاصد حماك

ما تبعدوش بعنطرة

كفاياك لَوَّع بقي كفاياك

ياتقول كذا ياتقول كذا

خد صف مين قال الكلام الحق

ولا وَنَّ عن طلب الحقوق بالحق

اسمع لي وما تسمعش أيها حد

خليك معايا، دا انا معايا الحق.

كُسِّلِي ان تعيش ماتسيب وراك ذكرى

واللي انخبل ماوعاش كلام ماعت

مالوش حبيب في الدنيا، ولا واحد

لا اليوم ولا بكره

واللي يَتَّبِع الذهب بالراحة

مايشوفش يوم فرحة

ولا يلقي يوم راحة

أما اللي حقه ضاع يدوق المر

واللي انكوي ف كلاويه، معايا جنابك؟

دا اللي اترمي بشكاويه علي أعتابك

يختصم قاتل عويل
افتح يا قاضي دق بابك قتيل
عمّال اهاتي وانت.. ولا سامع
واشكي لعظمتك لما راح الصوت
والله لا انا رايح اشتكيك
واقول واسخّ المدامع
واكنس عليك تراب مقام
أنوبي رب الموت.
فرغت الحدوثة

أخيراً، بعد ماعم غنام الفلاح طلعت روحه، حس الوزير انه خلاص. اتعصر
لحد آخر نقطة من دمه المسكر الحلو، وآن الأوان يملا بيه كاس الملك عشان
يسكر. فبعت اتنين يحضروا الفلاح.

عم غنام خاف طبعاً. وقال في عقل باله:
- والله وجالك الموت يا غنام. وساعة الحساب أهى جت، علي كل اللي
اتسحبت من لسانك وقتله.

أما اللي قاله بصوت عالي:

- الأمر لله يا حراس. خدوني مطرح ما تاخدوني. الموت للي زبي رحمة: هو
بحر النيل، يميل عليه العطشان يطفي حرقته. وانا عطشان للموت، أحسن ما
اموت كل يوم علا باب المحكمة. وموتكم بطيء، راكب دماغه وراسه وألف
سيف ما يجيش.

وحضر الفلاح يَسْتَلْقِي وعده. ووقف قدام قِيم القصر مسلم لقضاه. رينزي ابن ميرو قال له ماتخافش. وسيب موضوعك علياً، أنا ح اجيب لك حقك. الفلاح ماصدقش:

- يعني ح اكل واشرب معاك عيش وبوظة للأبد؟!
- استني بس. دلوقتي ح تسمع كل الكلام اللي قلته.
وأمر رينزي واحد من الأتباع يقرأ علي الفلاح كل شكاويه، كلمة بكلمة، وبعث التسع عرايض لمولانا الملك.
الملك قراها وانسجم، وانسرّ قلبه بكلام الفلاح أكثر من أيها حاجة ف برك يامصر.

قال الملك:

يا ابن ميرو. انظر بنفسك في الموضوع، واحكم بنفسك في القضية.
وعليه أمر رينزي اتنين من الحجاب يحيبوا "تحوت" الحرامي من قفاه ويجرجروه ع المحكمة. وحكم رينزي ابن ميرو قيم القصر وقاضي القضاة ع المتهم المدعو "تحوت النغة" بحصر أملاكه كلها (قحه وشعيه وحميّه وخنازيه وغيظه وبيته بالخدامين اللي فيه). كل دا أصبح ملك عم غنام الفلاح.
كده الحكاية انتهت.

ودا اللي كان مكتوب في ورق البردي

عن عم غنام

فلاح غيط الموالح.

من صفحة حراس الهوية المصرية ٢٠١٤

نماذج التعديلات : سامي حرك:

- غنام (خنوم) - غيط الموالح (غيظ الملح) - بوظة (بيرة) - ننوسا (ننسو) -
- اهناسيا (اهناس) - تحوت النغة (تحوت نخت) - ناظر (قيم) - رب (إله)
- سلامو عليكو (سلامه عليكم) - بيترافع (يترافع) - بتنط (بتقفز) - سكة
- حمو (سخت حموت) - عزبة (قرية) - إستنا (إستني) - الملك (الفرعون) -
- إلحقني (أغثني) - بق (قدح) - بر فيافي (برفيوفي) - النتاش (الطماع).

1784 وسيم السيسي, والمحترفين

شهادتي فيه مجروحة, لأن بيننا عشرة وصداقة وزمالة ف صالون عالم المصريات
الكبير محسن لطفي السيد
بقا مشهور ف عالم المصريات, أكثر من الأثريين المحترفين والموظفين الحكوميين!
- له غلطات؟

أكيد, وكلنا بنغلط, ومين ف الوجود كله مبيغلطش
أومال التربص والهجوم الجامد ده عليه, سببه إيه؟
- غيرة!

- هجمة مرتدة, بعد سقطة "مونيكا" اللي محسوبة ع المحترفين!
بالهداوة كده, تعالو نسيبنا من الشخصية, وندخل ف أهم سبب للهجوم!
يقولك: إزاي "طبيب مسالك" يتكلم ف علم المصريات؟



ويوضحوها: إززاي تسيبو خريجين الآثار, وتسمعو ل الي مش خريجين متخصصين؟

يعني دي خلاصة المشكلة, المحترفين والهواة!

مادام وصلنا ل كده, تعالا أقولك, وأديك أمسلة (أمثلة) من العالم:

1. مايكل فاراداي, كان صبي فقير بتاع تجليد كتب, بقا أعظم عالم تجريبي ف الكهرباء والمغناطيسية

2. سرينيفاسا رامانوجان, كاتب حسابات فقير من غير تعليم جامعي. أعظم الرياضيين ف التاريخ

3. جورج ايستمان, مخترع كوداك, كان موظف بنك عادي

4. توني فاديل, مخترع ال ipod, كان عامل جراج

وآدي كان من عالم الايجيبتولوجي نفسه:

1. جيوفاني بلزوني الايطالي المشهور, الي فتح مقبرة سيتي الاول, كان عامل سيرك

2. هوارد كارتر، الشهير، مكتشف مقبرة توت عنخ آمون، مجرد رسام

3. جيمس هنري بريستيد، قسيس، رجل دين عادي

مش هقولك إن يوسف ادريس الروائي الموهوب، كان طبيب
ولا عباس العقاد، المفكر والكاتب الكبير، مدخلش الجامعة ولا حتا التوجيهية!
إنما هقولك إيه

فيه بالاضافة لكل اللي فوق ده، مهن موسوعية، بطبيعتها، الدراسة فيها بتشرح
المجتمع من كل جوانبه، زي الطب اللي بيشرح الجسم البشري والنفس
البشرية من كل جوانبها، وزي القانون اللي بينظم المجتمع من كل تخصصاته!
يعني فيه قانون زراعي وتجاري وضرايب وتأمينات وبحري وجوي ودولي، فيه
قوانين للمتاحف والآثار، ولازم يبقا عند اللي بيدرس، شوية من كل حاجة،
ولو زود الشوية دول يبقا خير وبركه، مش عيب خالص!

طيب علا أرض الواقع الجماعة المحترفين المتخصصين أوي دول قدمو إيه؟
- ولا حاجة!

خدو إيه وقدمو إيه؟

- خدو المرتبات والمكافئات والخوافز والبدلات والأجازات، وإنجازاتهم ف علم
المصريات (0) ولا أي حاجة، ينقلو من الخواجات نقل مسطرة!
طب الهواة، بعضهم خد شهرة، إنما إنجازاتهم بتتلخص ف أهم حاجة، زيادة
الوعي بالهوية المصرية!

الملايين اللي عارفين دلوقتي يعني ايه مصر، أساميا وتاريخها وحضارتها، دول
من إنجازات الهواة!

مصطلحات وتجمعات "القومية المصرية" , "الهوية المصرية" , "الفرعونية" ,
"الكيميائية" .. نخ, كلها أنتجها ونشرها وشرحها الهواة, عارضها وحاربها
المحترفين المتخصصين, وكأنها تهديد لأكل عيشهم!
الاحتفال بالسنة المصرية والتقويم المصري, والأعياد المصرية القديمة, من
إنجازات الهواة!

اكتشاف وشرح قواعد اللغة المصرية الحالية واستقلالها كلغة كاملة, قواعد
والفاظ , إنجازات الهواة

الحوار حول "فرعون" الكلمة والجنسية, والفرق بين الفرعونية والمصرية, من
إنجازات الهواة, والمحترفين هنا سلفيين أصوليين ملتزمين بكلام الخواجات!

تفسير كلمة "نتر" والبراءة من تهمة تعدد الآلهة, مجهودات الهواة
هنا المحترفين عملوا أصنام من قواميس الخواجات وطريقة نطقهم الاصطلاحي
ل اللغة المصرية, وكأنهم عبدة للأصنام, والهواة المتحمسين للهوية المصرية
كأنهم اللي يحطموا الأصنام دي!

مكننش أحب تبقا الخناقة كده, والردح بالطريقة دي

لأن المحترف له دور

والعاشق الشغوف الهاوي, له دور

وكل واحد يبص ف ورقته

لولا الهجوم القاسي علا أخويا الدكتور وسيم

معلش يا كبير, خليك ف طريقك, وقول نظرياتك وزود ف اجتهاداتك

وسيبك من كل دول ودوله ودوكهمه!

الفهرس

1.....	مقدمة
2.....	1693 جلابية
3.....	1694 لف .. لفة
6.....	1695 خلفتة .. خلفنة
8.....	1696 الجنة وأساميها
9.....	1697 شذوذ .. غزو
11.....	1698 اللغة العربية، أجنبية
12.....	1699 عجرة
13.....	1700 حب الغير
14.....	1701 عن حروف الكتابة
17.....	1702 نشر
18.....	1703 صورة جدي
19.....	1704 السنة مجرد "لفة"
20.....	1705 رفيق

21.....	عاش	1706
22.....	ناووس، ولا تابوت	1707
23.....	المنحة يا ريس	1708
24.....	فل وياسمين	1709
26.....	قنطرة	1710
27.....	فشريا لينا؟	1711
28.....	مقاول .. مقاولات	1712
29.....	طلع علا فشوش!	1713
31.....	جبل الوصال خليه واصل	1714
33.....	ربنا ينتعك بالسلامة	1715
35.....	قصر	1716
36.....	صبي	1717
37.....	غنوصية	1718
38.....	زلق	1719
39.....	أوطه	1720
40.....	رصد	1721
41.....	يوم الصدفة	1722

43.....	هرم .. أهرامات	1723
45.....	الحيسييين (الحيثيين)	1724
46.....	الغالي علينا غالي	1725
48.....	ناشف	1726
49.....	رقم	1727
52.....	أبو الهول	1728
53.....	الهكسوس / 3	1729
56.....	طقم	1730
58.....	لعلع	1731
60.....	خضة	1732
61.....	عاش من شافك	1733
62.....	سندان	1734
63.....	هيه	1735
64.....	فرج	1736
65.....	زهور	1737
66.....	زلزال	1738
67.....	صاحي	1739

68.....	1740	.. خسارة/ جاي
70.....	1741	تنح/ تناحة
71.....	1742	بنكتب حسب قواعد المصري
72.....	1743	آدم
73.....	1744	جزر
75.....	1745	لطح لطح
76.....	1746	خالي وخالية
78.....	1747	لبن
79.....	1748	برشامة
81.....	1749	قال شامي قال
82.....	1750	عادي
83.....	1751	الكحة
84.....	1752	عبير
84.....	1753	.. خوتة
86.....	1754	حوكش
87.....	1755	مأموصة
88.....	1756	تاي

89.....	أبعدية	1757
90.....	ع الترة	1758
91.....	طفطف	1759
92.....	العايق والعايقة	1760
93.....	رواد اللغة المصري	1761
95.....	دول	1762
96.....	هات	1763
98.....	شيكل	1764
100.....	أداة استقرار واستقرار	1765
103.....	واه، أداة استعجاب	1766
104.....	مشعت	1767
106.....	متل امبارح	1768
108.....	بريد	1769
109.....	هاو أو أو	1770
110.....	شريط (مشرط)	1771
111.....	م "نعول" أبو اللي بيكره مصر!	1772
112.....	قح	1773

114.....	زهرة	1774
115.....	تنك	1775
116.....	أشمون	1776
118.....	لسه	1777
119.....	نجا	1778
121.....	سيدنا موسا عنديكو؟	1779
123.....	فل	1780
124.....	تجيد الارهابي المجنون	1781
125.....	ملك الحواديت	1782
128.....	الفلاح الفصيح	1783
141.....	وسيم السيسي	1784